

# यूहन्नाए ओसरो

## चाव था

आव पोस्तोको येसुए उसिस यूहन्नाए ओसरो ज़। नो मिँलाई येसुए उयुँलाव मिताव उसिस मनी है यादोज़्याव (यूहन्ना २१:२०,२४)। आव पोस्तोकोल येसु डादाकिनकाव परमेस्वर मिँ मिन्सिद हुव ज़ रैं:ज़्या — “आलाव सर्सिउ भरी जे येसुलाई, परमेस्वरए ओज़ा गेलाई बाँचैऽयाव ख्रीस ज़ लिद जेयुँ सुहुपुदचान्याए जूनी सर्द डाय़ाचिके। हो ताकिन ची जे नोए ल्योदा जेयुँ जेसुहुपुकिन होए उमिननी अजम्बरी जुनी दैन्या जेले” (२०:३१)। नो पाँत यहूदीराए याघेप्पार यायुँ माहुपुद येसुस एकम्या माखैव ज़ यालिऽयाव ब रैं:ज़्या।

### परमेस्वर ज़ मिँ मिन्सिद उहुव

१ भा:ड पाँ उलिऽयाव ज़। नो पाँ परमेस्वरस उलिऽयाव। नो पाँ ओल परमेस्वर ज़। २नो डादाकिन ज़ परमेस्वरस उलिऽयाव। ३ताव भरी ब नो पाँनी ज़ ताहुकेर। नो पाँनी माताहुव काता ज़ माले। ४नो पाँनी ज़ पोहोन ब ताके। नो पोहोन ज़ मिँरालाई पलाँ जैदचान्या ज़गै ब ताके। ५नो ज़गैए चुम चुमोल पलाँ

जैऽयाव। नो ज़गैलाई चुम चुमोए माहातैधुव।

६तछा परमेस्वरए उपरीव यूहन्ना यादोज़्याव मिँ तोबो हुके। ७नो मिँ परमेस्वरनी हुव ज़गैवलाई प्राइँए सरेस्द यायुँ घुहुपुक लिद साचीए जूनी हुके। ८ओल ते नो ज़गै मा:क, ज़गैवलाई मिँरालाई सरेसो परीन्याए जूनी उहुव ची।

९नो ज़गै साचो ज़गै ज़ ओल्यो। नो आव मानुवात हुद प्राइँ मिँरालाई पलाँ

जैद याएज्याव। १० नो मानुवात हुवए ज़ आव नाम नम जैक्यो। हितावत ब आव मानुवाताव मिँराए ओललाई मासरेस्थुकेर। ११ ओल नो उमीँराए याल्योक ज़ हुके। खाली नोराए भन मासुम्केर। १२ हैदी मनी जो जोराए ओपाँर भैःद यायुँ हुप्ज़्या, हो होरालाई परमेस्वरए ओज़ार तान्या हक याएज्याव। १३ नोर परमेस्वरए ओज़ार याताव संसारलाव बाबु आमानी ब माःक, क्यॉए ओपैँज्यावनी ब माःक, मिँए गोहाईनी ब माःक, परमेस्वरनी वाज़ ताज़्यार।

१४ नो पाँ ज़ मिँ मिन्सिद गेल्योक हुके। ओबाबुनी हुव तोबोका तोबो ओज़ाए ओज़गै गेरैःके। नत ज़ परमेस्वरए ओसत स़ोनो गेल्योदा उयुँ ओय़ालो ब रैःके। १५ नोए उजूँनी यूहन्नाए चोइस क्रिद, “आवए उजूँनी ज़ जेलाई डादाकिन है डादाचि-ज्याव, ‘डाछींनी हुव डाकिन घ्योःव लिज़्या, काराव ल्यो ताकिन नो डाकिन डादाकिन ज़ उलिज़्याव,’ ” है लिद गोहाई याएक्यो। १६ होए ओक्याँनी ज़ गे परमेस्वरए उयुँलाव भरी दैद असिकए तर्त असिक गेदैके। १७ डादा मोसाए ल्योनी परमेस्वरए ओकानुन गेदैके, आज्याल फरी

परमेस्वरए उयुँ ओय़ालो स़ोनो साचो ओपाँ येसु ख्रीसनी गेदैके। १८ परमेस्वरलाई खर्क ज़ सुए ज़ मारैःर, ओबाबुए उयुँ स्याताव तोबोका तोबो ओज़ाए ओक्याँत ज़ सतैसिउ लिज़्या।

### रील सछैँज्याव यूहन्नाए ओयेन

(मत्ती ३:१-१२; मर्कूस १:१-८;

लूका ३:१-१८)

१६ यरूसलेम सहरनिकाव यहूदीराए यासकाव पुजारीर स़ोनो लेबीरालाई यूहन्नालाई, “नँ सु?” है दानाव यारापरीक ते, २० यूहन्नाए माम्मोसिद, “परमेस्वरए उपरीँज्याव ख्रीस डा माःक,” है ओरादोक ते, २१ “हुकी नँ सुकी, सैँ एलिया रो?” है यादोक ते, “अहँ, डा हो माःक,” है यादोक्यो। “हुकी नँ नो परमेस्वरए ‘अगमबक्ता तोबो डापरीरिज़्या’ है उलिज़्याव मिँ रो?” है यादोक ते, फरी ब, “डा हो ब माःक,” है यादोक्यो। २२ “हुकी नँ ज़ गेलाई है दाव ताके, नँ सु? गेलाई परीँज्यावरालाई नजूँनी गे है दाव ज़ परिके,” है यादोक ते, २३ यूहन्नाए, “डा यसैया अगमबक्ताए सर्द ओनैँज्याव मिँ ज़। नोए डाजूँनी ओसरो आव ज़ —

‘तोबोए ओर्गा बनल अइ लिद  
उक्किञ्ज्याव थास्त्रिञ्ज्या,  
हुरिञ्ज्याव प्रभुए ओयेम गाँत्या  
गुँतीलाई सदाँचिके,’ ”

है यादोक्यो।

२४नो पजैना हुवर फरिसीराए  
यारापरींवर याल्यो। २५नोराए फरी  
ब यूहन्नालाई, “नँ ख्रीस ब माःक,  
एलिया ब माःक, नो अगमबक्ता ब  
माःक ताकिन, नँ काराव मिँरालाई  
रील नरासछैँञ्ज्याव?” है यादोक ते,  
२६यूहन्नाए, “डा ते रील डारासछैँञ्ज्या,  
खाली जेखार्ल ज़ तोबो लिञ्ज्या, होलाई  
जे जेमासरेसे। २७नो ज़ डाछींनी  
हुरिञ्ज्या है डालिञ्ज्याव मिँ। डा ते नोए  
ओपोलाए ओचें पलाःन्या स्यासो ब  
डामाले,” है यादोक्यो। २८आव पाँ  
भरी यूहन्नाए ओरासछैँञ्ज्याव यर्दन भै  
होफताव बेथानिया यादोञ्ज्याव पोल  
ज़ ताके।

### येसु परमेस्वरए ओपाथा

२९हो पराःती येसु ओल्योदा  
उहुञ्ज्याव रँःद यूहन्नाए प्राइँलाई  
है यादोक्यो, “चिऊचिके, नो  
ज़ आव मानुवातावराए यापाप  
हाइद ख्यादचाञ्ज्याव परमेस्वरए  
ओपाथा। ३०नोए उजुँनी ज़ डादाकिन

है डादाचिञ्ज्याव, ‘डाछींनी तोबो  
हुरिञ्ज्या। नो डाकिन डादा ज़  
उलिञ्ज्यावए डाकिन घ्योःव लिञ्ज्या।’  
३१नोलाई डा मनी डामासरेस्ताव।  
हितावत मनी नोलाई इस्राएलीराए  
खार्नी पलेःद सतँदचान्याए जुँनी रील  
डारासछैँञ्ज्या।”

३२यूहन्नाए नोरालाई अइ लिद  
गोहाई याएक्यो, “डा परमेस्वरए  
उपुरूस कुइतम मिताव नमतिन  
भुहुँद ओक्याँत उचुसिञ्ज्याव डारँःके।  
३३नोलाई डानी ते डामासरेस्ताव,  
खाली डालाई रीनी सछैँव परींञ्ज्यावए  
है दाँक्यो, ‘जोए ओक्याँत परमेस्वरए  
उपुरूस हुद उचुसिउ नरँःञ्ज्या, होए ज़  
परमेस्वरए छैँव उपुरूसनी मिँरालाई  
यासछैँरिञ्ज्याव।’ ३४है जैद आव  
डामीए डारँःवनी ज़ जेलाई आव  
ज़ परमेस्वरए ओज़ा लिद थःरैद  
डायाचिके।”

### यूहन्नाए उसिसनी येसुस निबाव

३५हो पराःती फरी यूहन्ना नेब्लो  
उसिसनिस हो पोक ज़ च्याँःसिद  
यालिञ्ज्याक, ३६यूहन्नाए येसुलाई  
याडालाव घ्याँ ओबाञ्ज्याव रँःद  
उसिसनिलाई, “चिऊचिन्के, नो ज़  
परमेस्वरए ओपाथा,” है उनिदोक ते,

३७ नोनी नो पाँ थैद येसुए उछींत बाकिनी। ३८ येसु उछींदा ओभाल्सिक नोनिलाई उछीं उछीं निहुज्याव रँ:द, “जिन काता जिन्खिम्ज्याव?” है अनिदोक ते, नोनी, “गुर्बा, नँ काङ्क नलिज्याव?” है निदोक ते, ३९ येसुए, “हुद चिऊचिन्के,” है निदोक्यो। नोनी उछीं उछीं बाद उलिज्याव पोक ज़ बाद हो छचाम ओलस ज़ लिकिनी। नो याकेसो रिमदाडाव चार बजेवाक ओल्यो। ४० नो यूहन्नाए ओपाँ थैद येसुए उछींत बावनी तोबो सिमोन पत्रुसए ओभाइ अन्द्रियास ओल्यो। ४१ नो ननी बाद ओदाज्यु सिमोनस दैसिद, “गिन मसीहलाई गिन्दैके,” है दोक्यो। (हिब्रू खामनी मसीहए ओअर्थ ‘ख्रीस’।) ४२ नकिन ओदाज्युलाई ब येसुए ल्योक लाँक्यो। येसुए नोलाई लँ लँ चिऊद, “नँ यूहन्नाए ओज़ा सिमोन ज़, आकिनी नमिन केफास नैद डाईज्या,” है दोक्यो। (ग्रीक खामनी केफासए ओअर्थ ‘पहर’।)

### फिलिप सोनो नथानेलनी

४३ हुकिन हो परा:ती येसु गालीलदा बान्या युँ दाद होदा ओबाज्याक फिलिपलाई रँ:द, “नँ डास हुन्के,” है दोक्यो। ४४ नो फिलिप, अन्द्रियास सोनो पत्रुसनी निलिज्याव बेथसेदा

नाखारलाव मिँ ओल्यो। ४५ नो फिलिपए फरी नथानेलस दैसिद नोलाई, “गे मोसाए ओकानुनल सोनो अगमबक्ताराए धर्मसास्त्रलाव सर्द यानैज्याव मिँस गेदैसिके — नो ते योसेफए ओज़ा नासरतलाव येसु ची ओल्यो,” है दोक्यो। ४६ हा:त ज़ नथानेलए, “निताव नासरतनी सु ची चाव उहुरिज्याव?” है ओदोक ते, फिलिपए, “नँ ज़ हुद चिऊके,” है ओदोक ते, ४७ नथानेललाई ओल्योदा उहुज्याव रँ:द, येसुए नोए उज्जनी नक लिज्यावरालाई, “चिऊचिके, नो साचो इस्राएली, ओखत माल्यो मिँ,” है ओरादोज्याव ४८ नथानेलए थैद येसुलाई, “डालाई कै जैद नसरेस्नाव?” है ओदोक ते, येसुए, “फिलिपए नँलाई ओमाखुल्निद नेभारा सीं खँक नलिज्याक ज़ डारँ:निउ,” है दोक्यो। ४९ हा:त ज़ नथानेलए, “गुर्बा, नँ साचो ज़ परमेस्वरए ओज़ा, इस्राएलीराए राजा ज़ नल्यो,” लिद है ओदोक ते, ५० येसुए, “काता नेभारा सीं खँक डारँ:निउ है डादींवए, डालाई नयुँ उहुबो रो? साचो ज़ छींनी आवकिन घ्यो:व घ्यो:व डायेनर ब रँ:न्या नले,” है दाद, ५१ फरी प्राईलाई है यादोक्यो, “डा जेलाई साचो है डादाचिज्या, जे तछा नम फैसिउ सोनो ननी परमेस्वरए ओचाकज्यार

डा मिं मिन्सिउए डाल्योक हुव येन बाव येन यादोज्याव रँःन्या जेले।”

### येसुए रीलाई दाखमदच ओजैव

२ गालीलल याहुव स्रोंलात काना यादोज्याव नाखारल तोबो बिह्या ओल्यो। येसुए ओआमा ब नक ज़ उलिज्याव। २येसुलाई ब उसिसरास नो बिह्यालाव भत्यारल याराखुल्केर। ३नो बिह्याल याओज्याव दाखमदच ओखेमोत येसुए ओआमाए येसुलाई, “नलाव याओज्याव दाखमदच खेम्द ले,” है ओदोक ते, ४येसुए ओआमालाई, “अ माँ, आव येनत डालाई है तादाँयो, डाबेला माताताए,” है दोक्यो। ५नकिन येसुए ओआमाए नक लिज्याव नोकोररालाई, “येसुए जो है दाचिज्याव, हो ज़ दोच्यो,” है यादोक्यो। ६हाः बेलाक नल यहूदीराए याचलन मिताव चोखोइसिन्या री नैन्या दस पन्ध्र सेमे बाज्याव लुँए घागरीर छ गोता यारानैज्याव। ७येसुए नलाव येन दाज्यावबालाई, “आव घागरी भरिल री तसी तसी जैचिके,” है ओरादोव प्राइँना नोराए घागरी भरी यारासब्याल्केर। ८हाःत ज़, “आव री आनी तुपुरू क्योःद भत्यारलाव येन चलैज्यावलाई लाँदिचिके,”

है ओरादोक ते, नोराए लाँदिकेर। ९नो येन चलैज्यावए नो दाखमदच जैसिउ री ओदारक, आः डमो दाखमदच कातानी ओताव लिन्या मासैक्यो। नो ताव री गप्ज्यावराए वाज़ यासैज्याव। है जैद नो येन चलैज्यावए ब्याहोल्यालाई खुल्द, १०“उपुर्कावराए ते चाव दाखमदच भरी डादा ज़ भाःज्यार, ओपाहुनाराए कुधु याओवत वाज़ जाँ छ्यावाकाव याराएज्यार। नँ ते प्राइँरानी चाव छींङ पै साँचिद ननैज्याव ओल्यो,” है दोक्यो।

११येसुए आव प्राइँरानी उस०कताव ओसरेस गालीललाव काना नाखारल सतैक्यो। निताव अचम्बलाव ओसक्तीर रँःद उसिसराए येसुलाई यायुँ हुप्के। १२नकिन येसु ओआमा, ओभाइ स्रोनो उसिसरास कफर्नहुम सहरल बाद जाँवा पै लिकेर।

### येसुए बेपारीरालाई ध्यान फ़िमनी ओरापलेव

(मती २१:१२-१७; मर्कूस ११:१५-१६;  
लूका १६:४५-४६)

१३नाः बेलाक यहूदीराए निस्तार पर्व हुनाद उलिज्याव। नोए उज्जनी येसु यरूसलेमदा बाके। १४यरूसलेमलाव

ध्यान फ़िमल मिँराए घेर, बेधार, परिवार योःव ज़ यारानैज़्याव स़ोनो पैसा तोज़्यावर ब नल चुसिद यालिज़्याव रँःद, १५ येसुए उकुइत तोबो चें रैद कोर्ता जैद नो ध्यान फ़िमलाव लँःज़्यावर योःज़्यावरालाई रीःद याबेधा याघेंरास यापलेःक्यो। पैसा तोज़्यावरराए यातेबलर पल्लैदचाद यापैसार सोभोद याएक्यो। १६ परिवा योःज़्यावरालाई, “जे जेसमानरास आनी पुलुस्द बाचिके। आव डाबाबुए उफ़िमलाई काराव जे पसल जेजैज़्याव?” है यादोक्यो। १७ हाःत ज़ उसिसराए नो धर्मसास्त्रलाव सर्सिउ पाँलाई चेतैकेर। नलाव सर्सिउ आव ज़,

“अ परमेस्वर, नफ़िमए जूनी  
डादोःज़्याव ध्यावनाए  
डायुँल मेंः माँःती चाँःज़्या।”

१८ नाःत ज़ यहूदीराए यासेरराए येसुलाई, “नँ इताव येन दान्या परमेस्वरनी नदैव ताकिन गेलाई तोबो सरेस सतैदचाव ताके,” है यादोक ते, १९ येसुए, “जे आव ध्यान फ़िमलाई तैःचिकेदा, डा सोंलात सोचोइन्या डाले,” है ओरादोक ते, २० नोराए, “आव ध्यान फ़िमलाई छयालीस बर्सत गेजैके, कै जैद नँ सोंलात

नसोचोइधुरिज़्याव?” है दोकेर। २१ खाली नो ध्यान फ़िम ते येसुए ओल ओक्याँए उजूनी है ओरादोव ची। २२ येसु सिउनी ओसोवत वाज़ उसिसराए नो है ओरादोव भरी याका दोकेर। ननी ज़ नो धर्मसास्त्रलाव सर्सिउ पाँ स़ोनो येसुए ओपाँव पाँ भरी थःरैद पतिकेर।

### कुधुए येसुलाई यायुँ उहुबो

२३ निस्तार पर्व उहुवत येसु यरूसलेमल उलिज़्याक, अचम्बलाव ओदोव येनर रँःद नलाव मिँर कुधुए येसुलाई यायुँ हुप्के। २४ हैदी ब ओल येसुए मिँराए यायुँलाव पाँ भरी ओसैँज़्यावए नोराए याभर मादोक्यो। २५ सुए ज़ येसुलाई ‘आव मिँ इताव लिज़्या’ है दाव ओमापरिज़्याव, ओल ज़ प्राइँए युँलाव पाँ ओसैँज़्याव।

### येसुए निकोदेमसलाई है ओदोव पाँ

३ यहूदीराए घ्योःव याकचरीलाव निकोदेमस यादोःज़्याव फरिसी तोबो उलिज़्याव। २नो मिँ रील अलगज़ा येसुए ल्योक हुद, “गुर्बा, नँ परमेस्वरए ल्योनी गे मिँरालाई परमेस्वरए ओपाँ पैना हुव ज़ लिन्या गेसैँज़्या। नँस परमेस्वर ओमाल्यो



ताकिन नँ निताव येनर कातानी नदोधुरिञ्याव,” है ओदोक ते, ३येसुए, “नँलाई साचो है डादींञ्या, मिँ साःरोल ओमाजर्मिवा पै परमेस्वरए ओराज्या मारँःधुव,” है दोक्यो। ४निकोदेमसए फरी, “मिँ सेर्द कै जैद फरी उजर्मिञ्याव? सैं फरी ओआमाए उफूल पसिद उजर्मिञ्याव?” है ओदोक ते, ५येसुए, “फरी साचो है डादींञ्या, जो मिँ रीनी सोनो परमेस्वरए उपुरूसनी माजर्मिए, नो मिँ परमेस्वरए ओराज्याल मापसिधुइ। ६है जैद मिँनी जर्मिञ्याव मिँ ज़ ताञ्या, परमेस्वरए उपुरूसनी जर्मिञ्याव परमेस्वरए उमीं ज़ ताञ्या। ७डा नँलाई, ‘साःरोल जर्मिउ ताके,’ है डादींवनि अचम्ब तातानी। ८बतास मनी जोदा बान्या उयुँ लिञ्या, होदा ज़ बाञ्या। नोए ओर्गा ते थास्ञ्या, खाली कातानी उहुञ्याव, काना ओबाञ्याव लिन्या सुए ज़ मासैर। परमेस्वरए उपुरूसनी जर्मिञ्यावर ब हितावर ज़ ताञ्यार,” है दोक्यो।

९हाःत ज़ निकोदेमसए, “आव नपाँञ्याव कै जैद ओताञ्याव?” है ओदोक ते, १०येसुए, “नँ इस्राएलीराए यागुर्बा ताद ब नाः कै जैद नमासैंञ्याव? ११डा नँलाई

साचो है डादींञ्या, गे जो गेसैंञ्या हो ज़ गेपाँञ्या, जो गेरँःञ्या हो ज़ गेरासथैञ्या। खाली डा डासैव डारँःव भरी है डादाचिक जे जेमापतिनाए। १२आव मानुवाताव पाँ है डादाचिक जेमापतिनाकिन, स्वर्गताव पाँर है डादाचिक भन कातानी जेपतिरिञ्याव? १३स्वर्गनी हुव डा मिँ मिन्सिउकिन आव मानुवानी स्वर्गत बाव सु ज़ माले। १४किताव मोसाए बनल पितले घुल जैद तङ्गैद ओरायो, हिताव ज़ डा मिँ मिन्सिउ ब तङ्गैसिउ परिरिञ्या। १५है जैद जो जोराए डालाई यायुँ हुप्ञ्या, हो होराए अजम्बरी जुनी दैन्या लेर।

१६“परमेस्वरए आव मानुवाताव मिँरालाई उयुँ नाद तोबोका तोबो ओज़ा ब याएक्यो। है जैद जोए नो ओज़ालाई उयुँ हुप्ञ्या, नो कै मै माताद अजम्बरी जुनी दैन्या ले। १७परमेस्वरए ओज़ालाई मानुवाताव मिँरालाई खेम्न्याए जूनी उपरींव माःक, बुरू मानुवाताव मिँरालाई बाँचैन्याए जूनी उपरींव ची। १८है जैद जोए ओज़ालाई उयुँ हुप्ञ्या, होए परमेस्वरए ओसजा दैन्या माले। फरी जोए परमेस्वरए ओज़ालाई उयुँ माहुबे, होए तोबोका तोबो परमेस्वरए ओज़ालाई उयुँ



ओमाहुबोए ज़ परमेस्वरनिकाव सजाल परिधुके। १६परमेस्वरए मिँरालाई ओराफाल्ज़्याव आनी ज़ तारिज़्या — आव मानुवाल ओज़ाए ओक्याँत ज़गै जैद नैव। मिँर ते भन यायेन माचाव ओतावए नो ज़गैलाई देखा चुम चुमोलाई यामन लागिके। २०जोए माचाव येन दोज़्याव, होए ज़गैवलाई सोद 'डापाहा बाया' लिद ओछ्याचेए ज़गैवदा माहुइ। २१फरी जोए साचो येन दोज़्याव, होए 'डायेन भरी परमेस्वरनी ज़ ताव घरैःक' लिद ज़गैवदा हुज़्या।”

### रील सछैँज़्याव यूहन्नाए येसुए उजूनी ओपाँव


२२आव भरी ओतावत येसु उसिसरास यहूदिया खन्दल बाद नोरास जाँवा पै नल ज़ लिद नलाव मिँरालाई ब रील यासछैँक्यो। २३यूहन्नाए मनी सालीम छ्योकाव एनोन यादोज़्याव पोक ओरासछैँज़्याव, काराव ल्यो ताकिन नक री सर्बा ज़ उलिज़्याव। मिँर ओल्योक हुद रील यासछैँसिज़्याव। २४हाःक पै यूहन्नालाई भ्यालखानाल यामाभाःताव।

२५नो बेलाक ज़ यूहन्नाए उसिसर तोबो यहूदीस सछैँसिन्याए जूनी याखर्लेसिज़्याव। २६नोर यूहन्नाए ल्योक हुद, “गुर्बा, यर्दन भै होफताव

नँस लिज़्याव सतैद नयासिउ मिँए ब रील यासछैँज़्याव। भन प्राईं होए ओल्योक ज़ बाज़्यार,” है यादोक ते, २७यूहन्नाए, “परमेस्वरए ओमाएकिन सुए ज़ काता ज़ मादैधुव। २८नोए उजूनी डापाँव पाँ जे ब थैद जेनै। हाःक ज़, ‘डा ख्रीस माःक, डा ते होए ओड़ा ओड़ा परींसिउ मिँ,’ है डादाचिउ ची। २९किताव बिह्याल लुज़ालाई लाँज़्याव ब्याहोल्या ताज़्या, सोनो ब्याहोल्याए ओलाप्क च्याँःसिज़्यावए ओनै ब्याहोल्याए ओर्गा थैद रेंज़्या, हिताव ज़ डा मनी आव पाँर थैद डायुँ होलाँ ताज़्या। ३०ओल भन यादा ज़ तानाव परिज़्या, डा ते मेदा ज़ तानाव परिज़्या।

३१“रूतिन हुव प्राईंए तर्ताव ज़ ताज़्या। आव मानुवाताव मिँर ते मानुवानी ज़ ताद मानुवाताव पाँ ज़ दोज़्यार। स्वर्गनी हुव प्राईंए डैताव ज़ लिज़्या। ३२नोए स्वर्गताव ओथैव उरँःव भरी प्राईंलाई ज़ ओरासथैक ओपाँ सुए ज़ मापतिर। ३३ओपाँ भैःज़्यावर ते परमेस्वर साचो ज़ लिज़्या लिद यासही छाप याभाःव मिताव ज़ लिज़्या। ३४काराव ल्यो ताकिन परमेस्वरए उपरींव मिँ परमेस्वरए ओपाँ वाज़ पाँज़्या। नोए ओक्याँत परमेस्वरए ओल उपुरूस मागोइँद धोल पोगोल ज़ थुदिज़्याव। ३५है जैद





(४:६-१२)

स्वर्गताव ओबाबुए ओज़ालाई मया दाद प्राई उकुइत ज़ याद नैव। ३६ जो जोराए ओज़ालाई यायुँ हुप्ज़्या, नोर अजम्बरी जुनी दैन्यार ताज़्यार। फरी जो जोराए ओज़ाए ओपाँ माभैःर, नोराए अजम्बरी जुनी दैन्या मालेर, भन परमेस्वरए उरिस चोवर ताज़्यार,” है यादोक्यो।

### येसु सामरी मेंमास ओपाँव

रील सछैँज़्याव यूहन्नाकिन येसुए मिँर कुधु ओल्योदा जैद रील यासछैँज़्याव दी लिन्या फरिसीराए थैकेर। २ हैदी ब सछैँज़्याव ओल येसुए ते माःक, उसिसराए ची। ३ है जैद येसुए निताव पाँ सैंद यहूदियालाई रास्द डादाडाव उलिज़्याव गालीलदा ज़ बाके। ४ नदा

बान्या सामरिया खन्दलाव घ्याँ बाव उपरिज़्याव। ५ नलाव घ्याँ ओबाज़्याक सामरियालाव तोबो सुखार यादोज़्याव नाखारल हुके। नो नाखार याकूबए ओज़ा योसेफलाई ओयो पो छचोक उलिज़्याव। ६ नक याकूबए ओघोव कुवा ब उलिज़्याव। है जैद येसु बाद बाद बनै उथलिउए अधमर लावाक नो कुवाक नासिके।

७ हाःत ज़ सामरियालाव तोबो मेंमा री गप्ना हुके। येसुए नोलाई, “डालाई री तुपुरू ओन्या याव ताके,” है दोक्यो। ८ नो बेलाक उसिसर नाखार जीदा ज़्यान्यार लँःना बाद यालिज़्याव। ९ नो मेंमाए येसुलाई, “नँ यहूदी ताद कै जैद डा सामरी मेंमाए डाकुइताव री ओव नपैँज़्याव?” है दोक्यो। हाः बेलाक यहूदीर सामरीरास

काता सज्यो ज़ यामानैज़्याव।†  
 १० येसुए नोलाई, “परमेस्वरए नँलाई  
 याव ओपैज़्याव ब नमासैए, नँस री  
 निज़्यावलाई ब नमासरेसे। होलाई  
 नसरेसो ताकिन नँ ची होस निन्या  
 नल्यो। होए नँलाई जींदो री यान्या  
 ओल्यो,” है ओदोक ते, ११ नो मेंमाए,  
 “प्रभु, नँस री गप्प्या जा ब माले, कुवा  
 ब बनै पतालल लिज़्या। कातानी नो  
 जींदो री नयाँरिज़्याव? १२ आव कुवा  
 ते गेपुर्खा याकूबए ओघोव ची। आव  
 कुवानी ज़ ओज़ार स़ोनो ओहार  
 बेधाराए री याओज़्याव। काता नँ  
 याकूबकिन ब घयोःव नलिज़्याव  
 रो?” है ओदोक ते, १३ येसुए, “आव  
 कुवानी री ओज़्याव फरी ब छोस्न्या  
 ले। १४ डा डाराएज़्याव री ओज़्यावर  
 ते खर्क ज़ छोस्न्या मालेर। बुरू नो री  
 नोए ओक्याँत परीज़्याव रीमुल स्यासो  
 तान्या ले। नोए ज़ अजम्बरी जुनील  
 सकेस्न्या ले,” है ओदोक ते, १५ नो  
 मेंमाए, “हो ची ताकिन्दा प्रभु, डालाई  
 नो री याव ताके। डा फरी खर्क ज़ री  
 ब छोस्न्या डामाले, गप्हुव ब परिन्या  
 माले,” है दोक्यो।

१६ नकिन येसुए नोलाई, “नँ  
 नक्किमक बान्केदा, नरेलाई खुल्द

रैके,” है ओदोक ते, १७ नो मेंमाए,  
 “डा डारे ज़ माले,” है ओदोक ते,  
 येसुए, “‘डारे माले’ है नलिज़्याव ते  
 साचो ज़। १८ नरेर पाँच जना ताधुकेर।  
 आज्याल नँस लिज़्याव ब नरे माःक।  
 नो नपाँ ते साचो ज़,” है दोक्यो।  
 १९ नो मेंमाए, “प्रभु, नँ ते अगमबक्ता  
 ची नल्यो लिद ड़ासरेस्निके। २० गे  
 सामरीराए गेसाखा पुर्खाराए भाःकिन  
 ज़ आव दाँदात पुजा दोहुकेर।  
 जे यहूदीर ते ‘परमेस्वरए उपुजा  
 यरूसलेमल वाज़ दान्या ताए’ है  
 जेलिज़्या,” है ओदोक ते, २१ येसुए  
 नोलाई, “अ माँ, डालाई पतिनायो,  
 तछा स्वर्गताव डाबाबुए ओसेवा  
 आव दाँदात स़ोनो यरूसलेमल  
 वाज़ तान्या माले। २२ जे सामरीराए  
 परमेस्वरए ओसेवा मासैद ज़ जेदोज्या,  
 गे ते सैद ज़ गेदोज्या। बाँचिन्या  
 येम यहूदीराए ल्योनी वाज़ ताज़्या।  
 २३ खाली तोबो बेला हुज़्या, नो हुद  
 ब ले। नो बेलाक साचोस परमेस्वर  
 बाबुए ओसेवा दोज़्यावर साचो युँनी ज़  
 दान्या लेर। परमेस्वर बाबुए ओसेवा  
 दान्यार नितावर ज़ याखिम्ज़्याव।  
 २४ परमेस्वर ते पुरूस ज़। है जैद  
 ओसेवा दोज़्यावराए साचो युँनी ज़

†४:६ छुत बुक्किन्या — यहूदीर स़ोनो सामरीर यामाछुसिज़्याव।

४:६ एज़ा ४:१-५; नहे ४:१-२

दोज़्यार।” २५ हाःत ज़ नो मेंमाए, “ख्रीस यादोज़्याव मसीह हुरिज़्या लिन्या डासैज़्या। हो हुद आव पाँ भरी ओपोःस ज़ गेलाई पलास्दचान्या ले,” है ओदोक ते, २६ येसुए नोलाई, “नँस पाँज़्याव डा हो ज़,” है दोक्यो।

### येसुलाई उसिसराए ज़्यावर रैद यायो

२७ हाःत ज़ येसुए उसिसर नाखारनी केस्हुकेर। येसु तोबो मेंमास ओपाँज़्याव रँःद अचम्ब ताकेर। खाली येसुलाई, “काता नखिम्ज़्याव, काताए जूनी जिन्पाँज़्याव?” सुए ज़ है मादोधुकेर। २८ हुकिन नो मेंमाए ओघागरीर ख्यानैद नाखारदा बाद नलाव मिँरालाई, २९ “हुचिके, तोबो मिँलाई गेचिऊना। होए डादोव येन भरी ज़ है दाँक्यो। सैँ ख्रीस नो ज़ ओताव?” है ओरादोक ते, ३० नो नाखारलाव मिँर ननी पुलुस्द येसुए ल्योक बाकेर।

३१ नो मिँर येसुए ल्योक यामाकेस्हुद ज़ उसिसराए, “गुर्बा, आव गेरैव ज़्यावर ज़्युके,” है यादोक ते, ३२ येसुए, “जे जेमासैँज़्याव ज़्यावर डास ज़ लिज़्या,” है ओरादोक ते, ३३ उसिसर या याल, “सुवाराए ओललाई ज़्यावर रैद यायो सैँ?” है यालिज़्याव थैद, ३४ येसुए नोरालाई, “डा डाज़्याव ते

डालाई परींज़्यावए उयुँलाव मिताव येन दाद, ओयेन सयोःन्या ची। ३५ जे है जेलिज़्या, “एँःलाव गेभाःव धुर चार मैना छीनी वाज़ क्याःन्या ताज़्या।’ डा ते है डादाचिज़्या, एँःदा भाल्सिचिके, क्याःन्या बेला ताद ले। ३६ आख मनी नो क्याःज़्यावए ओजेला दैज़्याव, ओदोव येन मनी अजम्बरी जुनी पै रहिन्या ले। है जैद वास्ज़्याव सोनो क्याःज़्यावनी तछा सिप ज़ रँःन्या लिनी। ३७ याभाःज़्याव आहाती साचो ज़ थोरिज़्या — ‘तोबोए वास्ज़्याव, तोबोए क्याःज़्याव।’ ३८ हिताव ज़ डा मनी जेलाई जे काता ज़ जेमादोव पोल क्याःना परींद डानैचिए। छुतराए यादोव येननी जेजुँ दैन्या जेले,” है यादोक्यो।

### सामरियालाव मिँर कुधुए यायुँ उहुबो

३९ नो सामरी मेंमाए नो नाखारलाव मिँरालाई, “येसुए डा डादोव येन भरी प्राइँ ज़ पाँदचाँक्यो,” है ओरादोवए नलाव सामरीर कुधुए ज़ येसुलाई यायुँ हुप्के। ४० है जैद येसुए ओल्योक हुद, “नँ गेस ज़ ल्यो ताके,” है यादोक ते, येसु यास ज़ नेला लिके। ४१ नोर येसुए ओपाँ थैद भन कुधुए ज़ यायुँ हुप्के। ४२ नो मेंमालाई, “अब ते नँ नपाँ थैद वाज़ माःक, आव गेर्नाए ज़ ओपाँ थैद,

‘आव ज़ ओल्यो मानुवाताव मिँरालाई बाँचैना हुव ख्रीस’ लिन्या थऱैद गेयुँ ह्पुके” है दोकेर।

### येसु गालीलदा ओबाव

४३ येसु नल ओल्यो नेला ओतावत ननी पुलुस्द गालीलदा बाके। ४४ ओल येसुए मनी है उलिज़्याव, “अगमबक्तालाई ओनाखारलाव मिँराए सुए ज़ ओमान नैद माएर।” ४५ येसु गालीलल उहुवत नलावराए ओमान नैदचाद चावस नैकेर। नलावराए ड़ादा यरूसलेमलाव पर्वत येसुए ओदोव येन भरी रँःद यानैज़्याव।

### येसुए कर्मचारीए ओज़ालाई ओसगराँव

४६ येसु फरी गालीललाव काना यादोज़्याव नाखारल हुके। नल ज़ ड़ादा रीलाई दाखमदच ओजैव। नाः बेलाक ज़ राजाए तोबो ओकर्मचारीए ओज़ा कफर्नहुम सहरल ओजोरो उहुज़्याव। ४७ है जैद नो कर्मचारीए, ‘येसु यहूदियानी गालीलल हुद ले दी’ लिन्या थैद, येसुए ल्योक बाद सिउ पैज़्याव ओज़ालाई सगराँन्याए जूँनी ओलस लाँव ओपैज़्याक, ४८ येसुए नोलाई, “जे सरेसर स़ोनो अचम्बलाव येनर जेमारँःवा जेमापतिए,” है ओदोक ते, ४९ नो कर्मचारीए, “प्रभु,

डाज़ा उस० ओमाफ्याद तखेप हुदचाव ताके,” है दोक्यो। ५० नाःत ज़ येसुए नोलाई, “बान्के, नज़ा गराँधुके,” है ओदोव प्राइँना नो मिँ उयुँ हुपुद उफ़िमदा बाके। ५१ नो ओबाज़्याक ज़ ओनोकोरर फ़िमनी ओलस दैसिहुद, “नज़ा गराँधुके,” है यादोक ते, ५२ होए, “नो खा बेलाकिन ओगराँव?” है ओरादोक ते, “आभयो लाकाव एक बजेकिन ओजोरोए रास्क्यो,” है दोकेर। ५३ नाःत ज़ नो कर्मचारीए, “येसुए ड़ालाई ‘नज़ा गराँधुके’ है ओदाँव बेला ब नाःक ज़ ओल्यो,” लिन्या सैक्यो। है जैद ओल स़ोनो उफ़िमलावरास येसुलाई यायुँ ह्पुके। ५४ येसु यहूदियानी हुद गालीलल अचम्बलाव येन ओदोव आवस नेखेप ताके।

### येसुए नासिन्या छ्याम मिँलाई ओसगराँव

५ नकिन यहूदीराए पर्व तोबो उलिज़्याव। होए उजूँनी येसु ननी पुलुस्द यरूसलेमदा बाके। २ यरूसलेम सहर बारिसिउ भार्नानी पुलुस्न्या तोबो ‘बेधा ग्राम’ उलिज़्याव। होए ओड़ाक तोबो दह उलिज़्याव। नोलाई हिब्रू खामनी ‘बेथेस्दा’ है यादोज़्याव। नो दह घवाँगिल पाँच गोता छान्या भाःसिउ उलिज़्याव।

३नल याजोरो हुवर, याखँ याकुइ सिउर, काना दूंदाराए [री खा बेलाक छल्लिके लिद कींद यानैज्याव। ४नो दहल कैताक कैताक परमेस्वरए ओचाकज्या हुद री ओचलैज्याव। नो री ओचलैव बेलाक जो डात नो दहल पसिज्या, हो जो मिताव बेथा उलिदी ब ओगराँज्याव।]

५नल अरतीस बर्स भरी ओजोरो हुव तोबो मिँ उलिज्याव। ६येसुए नोलाई घ्याँसिद उलिज्याव रँ:द, 'आव ते कुधु बर्स ची ताके' लिन्या सैद नोलाई, "नँ सगराँसिउ नपैज्याव रो?" है ओदोक ते, ७नो ओजोरो हुवए, "प्रभु, सगराँसिउ ते डापैज्या। खाली री उछल्लिकक डालाई दहल सुए ची भा:नाव केदा? डा धो धो डाबाज्याक ज़ डालाई बलेंद छुत पसिज्या," है ओदोक ते, ८येसुए, "डा नँलाई है डादींज्या, च्याँ:सिद नतैर सिमद बान्के," है ओदोक ते, ९बेहार ज़ नो मिँ गराँद ओतैर सिमद बाके।

नो छचाम नासिन्या छचाम ओल्यो। १०है जैद यहूदीराए यासेरराए नो गराँवलाई रँ:द, "आछिम नासिन्या छचाम ची, नँ इताव गुर घुन्या माताए," है यादोक ते, ११नो गराँवए, "डालाई सगराँज्यावए ज़, 'नतैर

सिमद बान्के,' है ओदाँव ची," है ओरादोक ते, १२"नँलाई निताव है दाज्याव सु?" है दोकेर। १३खाली नो गराँव मिँ ओललाई सगराँज्यावलाई ब ओमासरेस्ज्याव। नो बेलाक मिँ बने काला मुलु यातावए येसु डादा ज़ ननी पुलुस्द ओबाधुव ओल्यो। १४छीनी येसुए नो गराँवलाई ध्यान भिमल रँ:द, "नँ आख ते नगराँके, आकिनी फरी पाप तादोयो, मानी भन ज़ माचाव तान्या नले," है ओदोक ते, १५नो मिँ भन ननी पुलुस्द बाद यहूदीराए यासेररालाई, "डालाई सगराँव ते येसु ची ओल्यो," है यादोनाक्यो।

१६येसुए नासिन्या छचाम मनी निताव येन ओदोवए यहूदीराए यासेरर ना:किन ज़ उखिरी पसिनाकेर। १७येसुए फरी नोरालाई, "डाबाबुए आ:पै ओयेन दाव ज़ नैज्याव। है जैद डा मनी डादोज्या," है यादोक्यो। १८नो पाँ थैद नोर भन ज़ मचिद, "आवए 'नासिन्या छचाम येन दान्या माताए' लिन्या कानुनलाई वाज़ ओख्याव मा:क, परमेस्वरलाई ज़ 'डाबाबु' है लिद ओल मनी परमेस्वरस सम सम जैसिज्या। आवलाई ते सै:व ज़ परिए," है लिकेर।

येसुए ओदोज्याव भरी ओबाबुनी  
वाज़ दोज्याव

१६ येसुए नोरालाई, “डा जेलाई साचो है डादाचिज़्या, डा ओज़ाए डाबाबुए ओदोज्याव येन डामारं:वा पै डानी काता ज़ डामादोधुइ। डाबाबुए जोनी दोज्याव, डा मनी हुनी वाज़ डादोज्या। २० डाबाबुए डा ओज़ालाई मया दाँज्याव। है जैद ओदोज्याव येन भरी डालाई मनी सतैदचाँज्याव। जे आव जेरं:ज्यावकिन भन घेप्पा येन सतैदचान्या ले। ननी भन ज़ अचम्ब तान्या जेले। २१ किताव डाबाबुए सिउरालाई सोचोइद जींदो याजैज्याव, हिताव ज़ डा मनी जोलाई डायुँ लिज़्या होलाई अजम्बरी जुनील बान्या डाजैज्या २२ है जैद, डाबाबुए सुए ओयेन ज़ माफालो, नो फाल्न्या भरी डा ओज़ाए डाकुइत ज़ याद नैनाव। २३ ननी ज़ किताव डाबाबुए ओमान नैद याएज्याव, हिताव ज़ डा ओज़ाए डामान ब प्राइँए नैदचान्या लेर। जोए डामान नैद मायाँव, होए डालाई परींज्याव डाबाबुए ओमान ब नैद मायो।

२४ “डा जेलाई साचो है डादाचिज़्या, जोए डापाँ थैद डालाई परींज्यावलाई

उयुँ हुपज़्या, नोए अजम्बरी जुनी दैद सजाल परिन्या माले। नो मिँ सिउल गनिसिउनी पुलुस्द सा:रो जुनी दैन्याल गनिसिज़्या। २५ फरी ब जेलाई साचो है डादाचिज़्या, नो बेला हुज्या, हुद मनी ले, जोए परमेस्वरए ओज़ाए ओर्गा ओथैकिन, नो मिँ सिउ उलिदी ब सा:रोल सैसिन्या ले। २६ किताव डाबाबुए ल्योनी पोहोन ताज़्या, डा ओज़ालाई मनी नो पोहोन यान्या जैद नैनाव। २७ है जैद डा ओलनी ज़ मिँ मिन्सिद डाहुवए मिँरालाई फाल्न्या हक ब डाकुइत ज़ याद नैनाव। २८ आव डापाँत अचम्ब ताताच्यो। तछा इताव बेला हरिज़्या, खादरल लिज़्यावराए मनी डा ओज़ाए डार्गा थैद, २९ सैसिद खादरनी पुलुस्न्या लेर। नोरानी चाव येन दाव भरी अजम्बरी जुनील बान्या लेर, माचाव येन दाव भरी सजाल बान्या लेर,” है ओरादोज्याव।

येसुलाई थ:रैदचाज्याव ओल  
परमेस्वरए ज़

३० “डा डानी ते काता ज़ डामा-दोधुइ। डाबाबुए ल्योनी किताव डाथैज्या, हितावनी ज़ डाफालज़्या। नो डाफालज़्याव भरी न्यायस डादोज्या,

काराव ल्यो ताकिन नो डादोज्याव डा डापैज्यावनी माःक, डालाई परीज्यावए ओपैज्याव मितावनी वाज डादोज्या। ३१ डाजूनी डा ज़ डापाँकिन, नो पाँ साचो माथ०रिए। ३२ डाजूनी पाँद डालाई थ०रैदद्याज्याव छुत ज़ लिज्या। होए डाजूनी पाँद ओयाँज्याव भरी साचो थ०रिज्या। ३३ जे रील सछैँज्याव यूहन्नाए ल्योक मिँर जेरापरीक मनी, नोए ब डाजूनी साचो थ०रिउ पाँ ज़ पाँके। ३४ हैदी ब मिँनी हुज्याव पाँनी ते साचो डामाथ०रिए। अइज जे यूहन्नाए ओरायो गोहाई रैद बाँचिर सैं लिद होए उमिन तखेप डाहाइज्या। ३५ यूहन्ना पलाँ जैज्याव बत्ती स्यासो ओल्यो। जे नोए ओजैव पलाँवल जाँवा पै रेंद जेलिके। ३६ खाली डास लिज्याव गोहाई यूहन्नाकिन ब घेप्पा लिज्या। डाबाबुए डालाई दाव उपरीनाज्याव येन डा डादोज्या, आव येनरानी ज़ परमेस्वरए उपरींव ज़ ओल्यो लिद सरेस्नाज्यार। ३७ डालाई परीज्याव डाबाबुए मनी डाजूनी ओल ज़ पाँद याँज्याव। जे होए ओर्गा ब जेमाथैताए, ओललाई ब जेमारँःताए। ३८ जे ते भन परमेस्वरए ओपाँ ब जेयुँल जेमानैए, उपरींव ओज़ालाई ब जेयुँ माहुबे। ३९ जे अजम्बरी जुनी दैन्याए जूनी धर्मसास्त्रल खिमो ज़ जेनेज्या। नो जेखिम्ज्याव धर्मसास्त्रए ज़ डाजूनी

गोहाई याचिज्याव। ४० हितावत ब नो जुनीए उजूनी डाल्योदा हुव जेमाभैःए।

४१ “डा मिँराए ल्योनी घेप्पा मिन ते डामाखिमे। ४२ खाली जे परमेस्वरए ल्योदा जेयुँ ज़ माले लिन्या डामैँज्या। ४३ डा डाबाबुए उमिननी ज़ हुद डाले, जे ते भन डालाई जेसोनाज्या। छुत सुवार या यामिननी याहुकिन होरालाई ते भन यामानर नैदद्याद जेरासुम्ज्या। ४४ जे तोबोका तोबो परमेस्वरए ल्योनिकाव दैन्या मान माखिम्द जे जेल मान खिम्ज्यावराए कातानी ची परमेस्वरए उपरींवललाई जेयुँ उहुप्रिज्याव? ४५ है जैद तछा परमेस्वर डाबाबुए ओड़ाक जेगलती थ०रैदद्यान्या डा पाँव मापरिए। जे जेखत पलेदद्यान्या जेयुँ जेसुहुपुज्याव मोसा ज़ तान्या ले। ४६ जे मोसाए ओपाँलाई साचो जेयुँ उहुपुज्याव ताकिन डालाई मनी जेयुँ हुपुन्या ओल्यो। होए डा डाजूनी ज़ सर्द ओनैज्याव। ४७ खाली जे होए ओसरो पाँलाई जेयुँ ओमाहुबो प्राइँना, डा डापाँत भन कातानी ची जेयुँ उहुप्रिज्याव?”

येसुए पाँच हजारलाई भरेस ओरायो

(मत्ती १४:१३-२१; मर्कूस ६:३०-४४;

लूका ९:१०-१७)

६ आव पाँ भरी ओतावत येसु गालील दह होफत बाके।

नो दहलाई तिबेरियास मनी है यादोज्याव। २ येसुए अचम्बलाव येनर ओदोज्याव, याजोरो हुवरालाई ओरासगराँज्याव मनी यारँःज्यावए ओल जोदा जोदा बाज्या मिँर ब उछीं उछीं बनै माहोल्या ज़ याबाज्याव। ३हो बेलाक येसु उसिसरास तोबो दाँदात बाद चुसिकेर। ४नो बेलाक यहूदीराए निस्तार पबर्ब हुनाद उलिज्याव।

५येसुए ओल्योदा हुज्याव माहोल्यार रँःद तोबो उसिस फिलिपलाई, “गे आव माहोल्यारालाई ज़्यावर कान्नी लँःद रैदचान्या?” है दोक्यो। ६खाली आव पाँ फिलिपलाई जाँचिन्याए जूँनी वाज़ ओल्यो। येसुए ओल दाव ओपैँज्याव येन ते ड़ादा ज़ थःरैद ओनैँज्याव। ७हाःत ज़ फिलिपए, “आः कुधुलाई तके तके वाज़ गेराएदी ब चाँदीए सिक्का नेसयवाए ब थैँन्या माले,” है ओदोज्याक ज़, ८छुत उसिस सिमोन पत्रुसए ओभाइ अन्द्रियासए येसुलाई, ९“आक तोबो छोज्यास पाँच गोता चिकाए भरेस सोनो नेब्लो डाँः लिज्या। खाली नाःकाव मिँरालाई काता ची ओतारिज्याव?” है ओदोक ते, १०येसुए उसिसरालाई, “नो माहोल्यारालाई बाँल चुसिउ यारापरींचिके,” है यादोक्यो। नल छी खाल् चुसिन्या पो बनै चाव

उलिज्याव। नो माहोल्यारानी खेपार वाज़ पाँच हजार यालिज्याव। ११नोर याचुसिउत येसुए नो पाँच गोता भरेस रैद धन्याबाद चरैःद ‘नो चुसिद लिज्यावराए घज्युरक’ लिद भाःद याएक्यो। फरी नो नेब्लो डाँःनिलाई मनी हिताव ज़ जैद भाःद याएक्यो। नोराए याफू तसी ज्युकेर। १२नोर ज़्याद यावाँःवत उसिसरालाई, “नो ज़्यादकाव यासय़ेलोर तके ब माख्यानैद दुप्चिके,” है ओरादोक ते, १३नोराए यासय़ेलो पाँच गोता चिका भरेसए उकुतुरार यादुप्क बाह भुर्नु ताके।

१४मिँराए येसुए इताव अचम्बलाव येनर ओदोव रँःद, “आव मानुवात हरिज्या है यालिज्याव अगमबक्ता साचो आव ज़ ची ओल्यो,” है लिकेर। १५है जैद नोराए येसुलाई करस याराजा जैव यापैँज्याव सैद येसु ननी पुलुस्द ओबातड ज़ तोबो दाँदात बाके।

### येसु री तर्त तर्त ओबाव

(मत्ती १४:२२-३३; मर्कूस ६:४५-५२)

१६नम ओभयानाक येसुए उसिसर दह छचोक भरिद, १७दोङ्गाल पसिद दह होफताव कफर्नहुमदा बाव यापैँज्याव। खाली नम भयाद चुम चुम ताद ब येसु ओमाहुवए





या वाज्ज दोङ्गाल पसिद बाकेर। १८याबाज्याक बनै घ्योःव बतास हुद रीलाई बनै ओहलैँज्याव। १९हितावल ज्ज यादोङ्गालाई छ किलोमितरवा यालाँवत येसु री तर्त तर्त याल्योदा उहुज्याव रँःद बनै छेःकेर। २०हाःत ज्ज येसुए, “ताछेःच्यो, डा ची,” है ओरादोक ते, २१नोर यायुँर होलाँ ताद दोङ्गाल हुव एकेर। याकेस्न्या पोक ब बेहार ज्ज केस्केर।

### येसु बाँचैज्याव ज्याव ज्ज

२२हो पराःती नो याराख्यानैव माहोल्याराए, ‘दह आफत दोङ्गा तोबो वाज्ज ओल्यो, नो दोङ्गाल ओल येसु ते माबाए, उसिसर वाज्ज याबाव’ लिन्या यासैँज्याव। २३येसुए धन्याबाद चरैःद मिँरालाई भरेस भाःद ओरायो पोक तिबेरियास सहरनी छुत दोङ्गार ब हुकेर। २४नो मिँराए येसुलाई सोनो उसिसरालाई काङ्क ज्ज यामारारँःवए नोर दोङ्गाल पसिद कफर्नहुमदा येसुलाई साप्नाकेर।

२५नोराए दह होफत येसुलाई यारँःव प्राईना, “गुर्बा, नँ खा बेलाक आड नहुव?” है यादोक ते, २६येसुए, “डा जेलाई साचो है डादाचिज्या, जे डालाई अचम्बलाव डायेनर रँःद

जेसाप्नाज्याव माःक, नो जेफू तसी भरेस ज्याव जेदैवनी जेसाप्नाज्याव ची। २७निताव ज्याद खेमन्या भरेस-लाई ताखिमच्यो, बुरू अजम्बरी जुनील लाँज्याव ज्याव खिमचिके। निताव ज्याव डा मिँ मिन्सिउए वाज्ज यान्या डाले। होए उजूनी ज्ज परमेस्वर डाबाबुए डालाई खतैद नैनाव।” २८हाःत ज्ज नो मिँराए, “हिताव ताकिन गे परमेस्वरए उयुँलाव मिताव येन काता दान्या की?” है यादोक ते, २९येसुए, “जे परमेस्वरए ओयेन दान्या आव ज्ज — परमेस्वरए उपरीव ओङ्गालाई जेयुँ सुहुच्चिके,” है यादोकयो। ३०नोराए, “नँ गेलाई गेयुँ सुहुपदचान्या ताकिन, किताव नसरेस सतैद नयासिरिज्याव, किताव येन नदोरिज्याव? ३१भाःक गेसाखा पुर्खाराए नाङ्ग्या पात्या बनल मन्न ज्युकेर। धर्मसास्त्रल मनी इताव सर्सिउ लिज्या,

‘मोसाए मिँरालाई स्वर्गनी हुव ज्याव याएक्यो,’ ”

है यादोक ते, ३२येसुए नोरालाई, “हैदी ब डा जेलाई साचो है डादाचिज्या, जेलाई स्वर्गनी हुज्याव साचो ज्याव मोसाए ओयाचिज्याव ते माःक, साचो ज्याव याज्याव ते परमेस्वर



डाबाबुए ची। ३३ डाबाबु परमेस्वरए ओराएज्याव स्वर्गनी हुव ज़्याव नो ज़ मानुवाताव मिंरालाई बाँचैज्याव,” है ओरादोक ते, ३४ नोराए, “हो ची ताकिन्दा प्रभु, गेलाई मनी नो ज़्याव याव ताके,” है यादोक ते, ३५ येसुए नोरालाई, “मिंरालाई बाँचैज्याव ज़्याव डा ज़। डाल्योक हुज़्याव करेन्या माले, डालाई उयुं हुपज़्याव खर्क ज़ री छोस्न्या माले। ३६ खाली डा जेलाई है दाद डानैचिए, जे डालाई रँ:द ब जेयुं ज़ माहुबे। ३७ हैदी ब डाबाबु परमेस्वरए ओयाँज्याव भरी डाल्योदा ज़ हुज़्यार। डाल्योक हुज़्याव भरी डा सुलाई ज़ डामारासोवोले। ३८ स्वर्गनी डा डापैँज्याव मिताव सयो:न्याए जूनी डाहुव मा:क, डालाई परींज्याव परमेस्वरए उयुंलाव मिताव सयो:ना डाहुव ची। ३९ डालाई परींज्यावए ओपैँज्याव आव ज़ — डालाई ओयाँज्याव भरिरानी डा सुलाई ज़ मासमैद परमेस्वरए ओराफाल्त्रिज्याव छचाम नोरालाई सिउनी सोचोइन्या डाले। ४० है जैद परमेस्वर डाबाबुए उयुं आव ज़ — डा ओज़ालाई रँ:द यायुं हुपज़्यावरालाई संसार खेम्न्या छचाम डा नोरालाई सिउनी सोचोइद अजम्बरी जुनील लाँन्या डाले।”

४१ येसुए ‘स्वर्गनी हुव ज़्याव डा ज़’ है ओरादोवए यहूदीर भन रूमूमैद, ४२ “आवए कै जैद ‘डा स्वर्गनी हुव’ है उलिज्याव? आवए ओबाबु ओआमानिलाई गे ज़ गेरासरेस्ज़्या। आव येसु ते योसेफए ओज़ा ज़ सानी,” है यालिक ते, ४३ येसुए, “जे काराव जेरूमूमैज्याव? ४४ डालाई परींज्याव डाबाबु परमेस्वरए डाल्योदा हुन्या युं जैद ओमाराएकिन सु ज़ डाल्योक माहुधुर। डाल्योदा हुज़्यावरालाई ते आव मानुवा ओखेमो छचाम सोचोइन्या डाले। ४५ अगमबक्ताराए यासरोल मनी इताव सर्सिउ लिज्या, ‘प्राइँलाई ओल परमेस्वरए ज़ यापैरिज्याव।’ जोए डाबाबु परमेस्वरए ओपाँ थैद सिऊसिज्या, हो डाल्योक हुज्या। ४६ परमेस्वर डाबाबुलाई सुए ज़ मारँ:तार। खाली ओलनी हुव डा ओज़ाए वाज़ रँ:द डानै। ४७ डा जेलाई साचो है डादाचिज्या, जोए डालाई उयुं हुपज़्या, होस अजम्बरी जुनी लिज्या। ४८ प्राइँलाई बाँचैज्याव ज़्याव डा ज़। ४९ जेसाखा पुर्खार ते बनल मन्न याज़्युदी ब सिद बाकेर। ५० स्वर्गनी हुव ज़्याव ज़्युज्याव ते खर्क ज़ सिन्या माले। ५१ नो स्वर्गनी हुव ज़्याव डा ज़। आव ज़्याव

ज्युज्याव मिं खर्क ज़ सिन्या माले। आव मानुवाताव मिंरालाई बाँचैन्याए जूनी याव डापैज्याव ज़्याव आव डाक्याँ ज़।”

५२ आव पाँत यहूदीर या याल खर्लेसिद, “आव मिंए कै जैद गेलाई ओक्याँ याद सव्राँव ओपैज्याव ओताव?” है यालिज्याव थैद, ५३ येसुए, “डा जेलाई साचो है डादाचिज्या, जे परमेस्वरनी हुव मिं मिन्सिउए ओक्याँत जेकरे जेमासैःकिन, उभीत जेरीछो जेमासैःकिन अइज़ सिउ स्यासोर जेताज्या। ५४ जोए फरी डाक्याँत ओकरे सैःज्याव, डाभीत उरीछो सैःज्याव, हो अजम्बरी जुनील गनिसिउ लिज्या। खेमन्या छचाम नोलाई सोचोइन्या डाले। ५५ काराव ल्यो ताकिन आव डाक्याँ साचो ज्यान्या ज़्याव ज़, डाभी साचो ओन्या री ज़। ५६ डाक्याँत ओकरे सैःज्याव, डाभीत उरीछो सैःज्याव, हो डास ज़ लिज्या, डा ओलस ज़ डालिज्या। ५७ किताव डालाई परीज्याव डाबाबुए ल्योनी बाँचिउ ज़ डालिज्या, हिताव ज़ डाक्याँत ओकरे सैःज्याव मनी डानी ज़ बाँचिन्या ले। ५८ है जैद डा ज़ स्वर्गनी हुव ज़्याव। नो ज़्याव जेसाखा पुर्खाराए याज्युव ज़्याव मिताव ते माःक। नोर नो ज़्याव ज़्याद माबाँचिर। आव है डालिज्याव ज़्याव ज्युज्याव ते

खर्क ज़ सिन्या माले।” ५६ आव पाँ भरी येसुए कफर्नहुमलाव धर्मसास्त्र फ़िमल ओरासथैज्याक ज़ है ओल्यो।

येसुए ओपाँत कुधुए यार्युँ ओक्याव

६० आव पाँ थैद येसुए उछींत बाज्यावर कुधुए, “आव पाँ बनै नाल क़्याव लिज्या, सुए ची ओथैधुरिज्याव?” है लिद ६१ यागन्नानैज्याव येसुए सैद नोरालाई, “आव पाँ जेयुँ केःद ओयाचिज्याव रो? ६२ हिताव ताकिन डा मिं मिन्सिउ जुनी डाहुव होदा ज़ तछा ओल्द डाबाज्याव जेरैःनाक भन हो छचाम कै जेलिरिज्याव? ६३ क्याँलाई बाँचैज्याव पाखाताव रैःज्यावए माःक, परमेस्वरए उपुरूसए ची। जेलाई है डादाचिउ पाँल मनी उपुरूस उलिज्यावए हो पाँए ज़ जेबाँचिज्या। ६४ खाली आव पाँ है डादाचिदी ब जे खवार आव पाँत जेयुँ ज़ माहुबे,” है यादोक्यो। येसुए ओललाई यार्युँ माहुप़्यावर डादाकिन ज़ सरेस्द ओरानैज्याव। ओललाई धोका याव पैज्यावलाई मनी डादाकिन ज़ सरेस्द ओनैज्याव। ६५ फरी नोरालाई, “है जैद ज़ जेलाई है डादाचिउ, डाबाबु परमेस्वरए सुवारालाई डाल्योदा हुन्या युँ जैद ओमाराएकिन सु ज़ डाल्योदा हुधुन्या मालेर,” है ओरादोज्याव।

६६निताव ओपाँए येसुस बाज़्यावर कुधुए ज़ ओललाई रास्द ओल्द बाकेर। ६७हाःत ज़ येसुए बाह जना उसिसरालाई, “जे मनी बाव जेपैज़्याव रो?” है ओरादोक ते, ६८सिमोन पत्रुसए, “प्रभु, गे नँलाई रास्द सुए ल्योदा बान्या? अजम्बरी जुनील बान्या पाँ ते नँस वाज़ लिज़्या। ६९परमेस्वरनी हुव छैव ओज़ा मनी नँ ज़ लिद सरेस्द गेयुँ हुप्द ज़ ले,” है ओदोक ते, ७०येसुए नोरालाई, “जे बाह जनालाई छाँतिज़्याव डा ज़। हैदी ब जेखार्ल तोबो ते सैतानसकाव लिज़्या,” है यादोक्यो। ७१येसुए आव पाँ सिमोन इस्करियोतए ओज़ा यहूदाए उजूनी है ओरादोव। नो मिँ बाह जना उसिसरानी ओललाई धोका याज़्याव मिँ ज़ ओल्यो।

### छापरा बासलाव पर्व

७ आव भरी ओतावत येसु गालील जीदा आदा होदा लिनाके। यहूदियालाव यहूदीराए यासेरराए ओललाई सैःव यापैज़्यावए नजीदा नोराए ल्योनी ओतर्किज़्याव। २नो बेलाक यहूदीर सालकाव तखेप छापरा जैद यामानिज़्याव पर्व हुनाद उलिज़्याव। ३है जैद येसुए ओभाइराए,

“नँ आव पोलाई रास्द यहूदियाल बान्के। हो ताकिन नसिसराए नड मनी नदोज़्याव येनर रँःन्या लेर। ४उमिन सथासो पैज़्याव मिँए मनी सुए ज़ ओयेन मोंद मादोव। नँ इताव येनर दोव नपैकिन मिँ भरिराए डाक सतैसिउ ताके,” है दोकेर। ५काराव ल्यो ताकिन नो ओभाइराए मनी ओललाई यायुँ ओमाहुप्ज़्याव। ६येसुए नोरालाई, “डा निताव येन दान्या बेला माहुताए, खाली जे जेजूनी ते बेला एकन्या लिज़्या। ७जेलाई आव मानुवाताव मिँराए सुए ज़ मासोचिर। डा फरी आव मानुवाताव मिँराए माचाव यायेन सतैद डाराएज़्यावए डालाई सोनाज़्यार। ८जे आव पर्व मानिना बाचिके, डा आख डामाबा, डाबेला माहुताए,” ९है दाद ओल गालीलल ज़ लिके।

१०हैदी ब येसुए ओभाइर पर्व मानिना याबाव छीनी ओल मनी सुए यामासैद होदा ज़ बाके। ११हो बेलाक पर्वत यहूदीराए यासेरराए, ‘येसु काङ्क उलिज़्याव?’ लिद सापो ज़ यालिज़्याव। १२नो माहोल्याराए मनी येसुए उजूनी कुधु ज़ यापाँज़्याव। ख्वाराए, “नो मिँ बनै चाव लिज़्या,” है यालिज़्याव, ख्वाराए फरी, “माःक,

नोए ते भन मिर तँदा ज़ यालाँज्याव,” है यालिज्याव। १३ हैदी ब यहूदीराए यासेरराए छ्याचेए सुए ज़ पाखात मापाँधुकेर।

### येसुए पर्वत परमेस्वरए ओपाँ ओरासथैव

१४ नो पर्व नेला सोंला ओतावत येसु ध्यान फिमल बाद परमेस्वरए ओपाँ ओरासथैज्याव। १५ ओपाँ थैद यहूदीराए यासेरर अचम्ब ताद, “आव मिर प्रि ज़ माप्रिउए कै जैद नाः ओसैँज्याव?” है यालिज्याव १६ येसुए थैद, “आव डासथैचिज्याव पाँ डा डापाँ माःक, डालाई परीँज्यावए ओपाँ ची। १७ परमेस्वरए उयुँलाव मिताव येन दोव पैँज्यावए वाज़ आव पाँ परमेस्वरए ओपाँ सैँ डा डापाँ ओताव लिन्या प्वालधुज्याव। १८ ओलनी पाँँज्यावए ते ओल उमिन सथासो पैँज्याव। ओललाई परीँज्यावए उमिन सथासो पैँज्याव ते ओखत माल्यो सोजो मिर ज़ लिज्या। १९ जे परमेस्वरए ओकानुन मोसाए ल्योनी जेदैके, खाली जे नो कानुनलाव येन ते जेमादोके। भन डालाई सैःव जेपैँज्या,” है ओरादोक ते, २० नो माहोल्याराए, “नँ दासा बिसा ताद

नले, नँलाई सुए सैःव ओपैँज्याव?” है यादोक ते, २१ येसुए नोरालाई, “जे काराव नासिन्या छ्याम तोबो येन डादोक हार जेमानिज्याव? २२ मोसाए जेलाई क्यालन्या सरेस जैन्या कानुन याद नैचिउ। तान्या ते नो कानुन मोसाए ओयाचिउ ते माःक, जेसाखा पुर्खाराए यायाचिउ ची। नो सरेस जैन्या नासिन्या छ्याम उपरिकिन जे मनी ते हो छ्याम क्यालन्या सरेस जेराजैँज्या। २३ निताव मोसाए ओकानुनलाई माबिरैन्याए जूँनी नासिन्या छ्याम क्यालन्या सरेस जैन्या ओताज्याव ताकिन, नासिन्या छ्याम डा तोबो मिँलाई डासगराँक जे काराव जेरिस ओचोज्याव? २४ जे मिर रँःद माःक, साचो युँनी फाल्नाच्यो।”

### येसुलाई आव ज़ लिद यामाथःरैधुव

२५ हाःत ज़ यरूसलेमलाव रूवा रूवा मिराए, “नो सैःव यापैँज्याव मिर आव माःक रो? २६ भन निताव प्राँँए डाक मामाँसिद ओपाँक ब सुए ज़ घाइ मादोर। सैँ गेसेरराए मनी ‘गेलाई बाँचैना हुव ख्रीस आव ज़’ है लिद याथःरैँज्याव ओताव? २७ साचो ख्रीस ओताव ताकिन ते आनी उहुव लिन्या सुए ज़ मासैँखेरहो। गे ते आवलाई

आनी हुव ज़ लिन्या प्राइँए गेसैँज्या,” है लिकेर।

२८ हाःत ज़ येसुए ध्यान फ़िमल ओर्गा बनै सघ्योःद अइ लिद यासथैक्यो, “जे डालाई ब जेसरेस-नाज़्या, आनी उहुव लिन्या ब जेसैँज्या। हैदी ब डानी डाहुव माःक, डालाई परीँव ओल साचो परमेस्वरए ज़। नोलाई ते जेमासरेसे। २९ डा ते डासरेस्ज़्या। डा ओल्योनी ज़ डाहुके, डालाई परीँज्याव ब ओल ज़,” है ओरादोव प्राइँना ज़, ३० नोराए क्योःव पैँकेर। खाली ओबेला ओमाहुतावए सुए ज़ हिउ माभाःधुकेर। ३१ हितावत ब नलाव लिज़्यावर कुधुए ज़ येसुलाई यायुँ हुप्द, “नो हरिज़्या है यालिज़्याव ख्रीस उहुवत, आव मिँकिन घेप्पा येन ओदोधुरिज़्याव रो?” है लिकेर।

३२ नो मोहोल्याराए येसुए उजूनी इताव खास खासनी खुस खुस यापाँज्याव फरिसीराए थैद नोर मुख्या पुजारीरास खैद ओललाई क्योःना ध्यान फ़िमलाव पाल्यार यारापरीँकेर। ३३ नो बेलाक ज़ येसुए, “डा जाँवा पै वाज़ जेस डालिरिज़्या, नकिन डालाई परीँज्यावए ल्योदा डाबारिज़्या। ३४ हाःकिन डालाई जेसाप्नादी ब दैधुन्या जेमाले, डालिज़्याव पोल

जे हुधुन्या ब जेमाले,” है ओरादोक ते, ३५ यहूदीराए यासेरर या याल है लिकेर, “आव मिँ काताड मोसिनाव ओपैँज्याव ब्याँ? ‘डालाई दैधुन्या जेमाले’ है लिज़्या। सैँ आव देसलाई रास्द ग्रीकराए खालाँव चितराँ पुतराँ ताव यहूदीराए खाल लिन्याद नोरालाई ओल्योदा ओराजैनारिज़्याव ओताव? ३६ नोए, ‘डालाई जेसाप्नादी ब दैधुन्या जेमाले, डालिज़्याव पोल ब हुधुन्या जेमाले,’ है उलिज़्यावए ओअर्थ काता ओताव?” है लिकेर।

### जींदो री

३७ पर्व स्योःन्या, प्राइँरानी घेप्पा छ्याम, येसुए प्राइँराए डाक च्याँःसिद ओर्गा बनै सथास्द, “छोस्ज़्याव मिँ डाल्योक हुद उरीँछो ओसैःहुवक। ३८ धर्मसास्त्रलाव सर्सिउ मिताव, जोए डालाई उयुँ हुप्ज़्या, होए उयुँनी जींदो रीमुल मिताव पुलुस्न्या ले,” है लिद यासथैक्यो।

३९ नो जींदो री है उलिज़्याव ओललाई यायुँ हुप्ज़्यावराए छैँव पुरूस यादैरिज़्यावए जूनी ज़ ओपाँ-ज्याव। हाः बेलाक पै येसु स्वर्गदा ओमाबातावए छैँव पुरूस परमेस्वरए ओमाराएताव।

४० हा:त ज़ नो माहोल्यारानी ख्वा ख्वाराए येसुए ओपाँ चावस थैद, “साचो आव ज़ ओल्यो, हरिज़्या है यालिज़्याव अगमबक्ता,” है लिकेर। ४१ ख्वाराए फरी, “नो ते परमेस्वरनी बाँचैना हरिज़्या है यालिज़्याव ख्रीस ज़,” है लिकेर। ख्वाराए फरी, “ख्रीस ताकिन गालीलनी ते हुव मापरिन्या। ४२ ख्रीस दाऊदए ओथोल जर्मिद दाऊदए ओनाखार बेथलेहेमनी हुन्या ले लिद धर्मसास्त्रल सर्सिउ लिज़्या सानी।” ४३ है जैद येसुए उजूनी नो माहोल्यार यापाँ माखैद कुधु खर्लेसिकेर। ४४ ख्वाराए ते ओललाई क्यो:व यापैँज्याव, खाली सुए ज़ हिउ माभा:केर।

### येसुलाई यामाक्यो:धुव

४५ छीनी नो फरिसीर स्रोनो मुख्या पुजारीराए येसुलाई क्यो:ना यारापरीव ध्यान भिमलाव पाल्यार अइज़ ओल्द याहुवए फरिसीराए, “येसुलाई काराव क्यो:द जेमारैव?” है यारादोक ते, ४६ नो पाल्याराए, “नोए ओपाँज्याव मिताव ते आ:पै खर्क ज़ गोमाथैताए,” है यारादोक ते, ४७ नो फरिसीराए, “जे मनी काता घरी नोए ओपाँ थैद तँदा जेबाधुव। ४८ गे फरिसीर स्रोनो

स्रेर ते नोए ओपाँत तोबो ब गोमाबाए सानी। ४९ इताव मोसाए ओपाँ मासैँज्याव याफ्या:हुव माहोल्याराए वाज़ नोए ओपाँ थैँज्यार,” है लिद यारासिडार्केर।

५० हा:त ज़ नक लिज़्याव फरिसीरानी येसुलाई ड़ादा तखेप दैना हुज़्याव नो निकोदेमसए, ५१ “गे गोकानुनल जो मिँलाई तादी ब नोए ओपाँ माफाल्द ओय़ेनताव ओगल्ती माथ:रैद कै जैद नोलाई सजा यान्या ओताज़्याव?” है ओरादोक ते, ५२ नोराए, “काता नँ मनी नोसकाव गालीललाव ज़ रो? अगमबक्ता गालीलनी सु ज़ हुन्या माले, अछादी नँ ज़ धर्मसास्त्रल चावस चिऊके,” है दोकेर।

५३ [हा:त ज़ मिँ भरी सु सु याभिमदा बाकेर। १ ओल येसु ते जैतून दाँदात बाके।

### पातर्नी मेंमा

२ हो परा:ती छकाल्न्या घग ज़ फरी ध्यान भिमल उहुवत मिँर बनै माहोल्या ओल्योक दुप्सिहुकेर। हा:त ज़ येसु चुसिद ओपाँ यासथैक्यो। ३ नो बेलाक ज़ सास्त्रीर स्रोनो फरिसीराए तोबो पातर्नी येनल क्यो:सिउ मेंमा-लाई रैद प्राइँराए ड़ाक सच्यौँद,

४येसुलाई, “गुर्बा, आव मेंमाए पातर्नी येन ओदोऽयाक ज़ क्योःद नल्योक रैद गेनै। ५मोसाए ओकानुननी ते निताव येन दाऽयावलाई लुँए भेःद सैःन्या लिऽया, नँ कै नलिऽया नी?” है दोकेर। ६आव पाँ येसुलाई क्योःन्याए जूँनी अइज़ अखतैँ थाँद यानैऽयाव। खाली येसुए नोरालाई घाइ मादाद घोम लिद ओआडुलाए नामक सक्यो। ७नोराए घरी पाला यासुधिक येसु च्याँःसिद, “जेनी जोए काता पाप ज़ मादोव, होए ज़ आव मेंमालाई प्राइँरानी ड़ात लुँए ओभेःवक,” है दाद, ८फरी ब घोम लिद नामक सक्यो। ९नो पाँ थैद नोर यासेरनी यासेरनी तोबो तोबोनी ओपोःस ज़ बाकेर। नो भरी याबावत नो मेंमा सोनो येसुनी वाज़ रहिकिनी। १०येसु फरी ब च्याँःसिद नो मेंमालाई, “अ माँ, नँलाई रैऽयावर काना याबाव? सुए ज़ नपाहा भ्नाःद यामाईधुव रो?” है ओदोक ते, ११नो मेंमाए, “हैज़ प्रभु, डापाहा भ्नाःदयान्या सु ज़ मापुलुस्केर,” है दोक्यो। हाःत ज़ येसुए, “डा ब नखत पलेःद डामाईए, नभ्रिमदा बान्के। आव माचाव नयेन फरी तादोयो,” है दाद परींक्यो।] ]

### येसु आव मानुवाताव ज़गै

१२येसुए फरी मिँरालाई, “डा ज़ आव मानुवाताव ज़गै। डाछीँत हुऽयाव मिँ चुम चुमोल बाव मापरिए, अजम्बरी जुनील लाँऽयाव ज़गैवल ताऽया।” १३हाःत ज़ नलाव फरिसीराए निताव पाँ थैद, “नँ नजूँनी नँ ज़ गोहाई नएऽयावए नगोहाई अनाकलाव ज़ लिऽया,” है यादोक ते, १४येसुए, “डा डाजूँनी डा ज़ गोहाई डाएदी ब नो पाँ अनाकलाव माले, काराव ल्यो ताकिन डा वाज़ कान्नी डाहुव, काना डाबारिऽयाव लिन्या डासैँऽया। जे ते नो भरी जेमासैँए। १५जे ते मिँराए गोइँनी वाज़ छचाप जेलैनाऽया। डा ते सुलाई ज़ छचाप डामारालैए। १६खाली डा निताव येन डादोदी ब नो साचो ज़ थंरिऽया, काराव ल्यो ताकिन नो येन डा वाज़ डामादोए, डालाई परीँऽयाव डाबाबुए मनी डास ज़ दोऽयाव। १७जे जेकानुनल मनी ‘नेब्लोए निपाँ ओखैकिन वाज़ नो पाँ साचो थंरिऽया’ लिद सर्सिउ लिऽया। १८हिताव ज़ डा डाजूँनी पाँऽयाव तोबो डा ज़, तोबो डालाई परीँऽयाव डाबाबु ज़,” है ओरादोक ते, १९फरिसीराए, “हुकी, नबाबु काड्डु उलिऽयाव की?”



है यादोक ते, येसुए, “जे ना डालाई जेसरेस्नाइया, ना डाबाबुलाई जेसरेस्नाव ताकिन डाबाबुलाई मनी सरेस्न्या जेल्यो,” है यादोक्यो। २० येसुए आव पाँ भरी ध्यान भिमलाव भिती याचरैःज्याव पोक ज़ ओरासथैज्याव। हितावत ब ओबेला ओमाहुतावए सुए ज़ माक्योःधुकेर।

### येसुलाई मासरेस्ज्यावर यापापल सिन्या लेर

२१ येसुए फरी नोरालाई, “डा जाँवाक आनी डाबारिज्या। हाः बेलाक डालाई जेसाप्नादी ब जेपापल ज़ सिन्या जेले। डा डाबाज्याव पोड जे हुधुन्या जेमाले,” है ओरादोक ते, २२ यहूदीराए यासेरर या याल, “आवए काता ओपाँज्याव इताव — ‘डा डाबाज्याव पोड जे हुधुन्या जेमाले,’ है लिज्या? सैं ओलनी ज़ सैःसिउ ओपैँज्याव ओताव?” है यालिज्याव। २३ येसुए फरी, “जे मेलावर ज़, डा रोताव ज़। जे आव मानुवातावर, डा ते आव मानुवाताव माःक। २४ है जैद ज़ जेलाई है डादाचिउ, जे जेपापल ज़ सिन्या जेले। ‘डा हो ज़’ है दाद ब जेमापतिनाव प्राइँना नो जेपापनी कातानी उस्किउ जेदैरिज्याव?” है ओरादोक ते, २५ नोराए फरी ब,

“हुकी, नँ सुकी?” है यादोक ते, येसुए, “डाजूनी जेलाई डादाकिन ज़ है दाव ज़ डानैचिज्या सानी। २६ डानी ताकिन ते जेलाई है दान्या ब कुधु ज़ लिज्या, जेखत पले-दयान्या ब कुधु ज़ लिज्या। खाली डालाई परीँज्यावए ल्योनी डाथैव भरी वाज़ आव मानुवाताव मिँरालाई डारासथैज्या। होए ओपाँ थ०रिउ ज़ लिज्या,” है यादोक्यो। २७ खाली येसुए नो भरी ओबाबु परमेस्वरए उजूनी ओपाँव नोराए अफ़ मनी माबुभिकेर।

२८ येसुए फरी ब है यादोक्यो, “जे डा मिँ मिन्सिउलाई क्रुसत जेतङ्गैनारिज्याव छयाम वाज़ ‘डा हो ज़’ लिन्या सरेस्न्या जेले। डादोज्याव भरी डानी काता ज़ डामादोए, डाबाबुए ओपैनाव वाज़ डापाँज्या लिन्या ब सैँन्या जेले। २९ डालाई परीँज्याव डास ज़ लिज्या। डादोज्याव येन भरी ब उयुँलाव मिताव ओतावए डालाई डाबातड मानैनाव।” ३० नो पाँत नक लिज्यावर कुधुए ज़ येसुलाई यायुँ हुप्के।

### अब्राहामए ओथोर सोनो सैतानए ओथोर

३१ येसुए ओललाई यायुँ हुप्ज्याव यहूदीरालाई है यादोक्यो, “आव डापाँत धिद जेलिकिन जे साचो डासिसर ज़ जेताज्या। ३२ साचो

पाँर सैंद, नो पाँए जे पला·सिउर जेतारिज़्या,” है ओरादोक ते, ३३नोराए, “गे ते अब्राहामए ओथोर ची, सुए उधूँल ज़ गेमालिताए। नँ कै जैद गेलाई ‘पला·सिउर जेतारिज़्या’ है नदासिज़्याव?” है यादोक ते, ३४येसुए, “जेलाई साचो है डादा-चिज़्या, पाप दाज़्याव मिँ पापए धूँल बाँदा मिताव लिज़्या। ३५बाँदा एकमन्या फ़िमलाव माताए, फ़िमए ओर्गेए ओज़ा ते एकमन्या फ़िमलाव ज़ ताज़्या। ३६है जैद डा परमेस्वरए ओज़ाए जेलाई पला·द डारास्चिकिन, जे ननी चबनै पला·सिउर ज़ जेताज़्या। ३७जे अब्राहामए ओथोर लिन्या डा ज़ डासैंज़्या। हितावत मनी डा डापाँ जेयुँल लिन्या पो ओमादैवए डालाई सैःव जेपैँज़्या। ३८डा डापाँज़्याव भरी डाबाबुए ल्योडाव डारेंःव वाज़ डापाँज़्या। हिताव ज़ जे मनी जेबाबुए ल्योनी जेथैव वाज़ जेदोज़्या,” है यादोक्यो।

३९नोराए भन, “गे गेबाबु ते अब्राहाम ज़,” है लिकेर। येसुए, “जे साचो अब्राहामए ओज़ार जेताकिन जे मनी होए ओदोव मिताव येन दान्या जेल्यो। ४०जे ते भन परमेस्वरनिकाव डाथैव सतलाव पाँर जेलाई डासथैचिक डालाई सैःव जेपैँज़्या। अब्राहामए ते निताव येन मादोव।

४१जे ते छुत जेबाबुए ओयेन जेदो-ज़्या,” है ओरादोक ते, नोराए, “गे नामज्यार माःक, गे गेबाबु तोबो ज़ लिज़्या, ओल परमेस्वर ज़,” है दोकेर।

४२हाःत ज़ येसुए, “साचो जे जेबाबु परमेस्वर ज़ ताकिन जे डालाई मया दान्या जेल्यो। डा ओल परमेस्वरनी हुव ज़। आव मानुवात डानी डाहुव माःक, ओल उपरीनाव ज़। ४३आव डापाँ कै जैद जेमातीधुज़्याव? थैन्या युँ जेमादोज़्याक ज़ जेमातीधुइ। ४४जे जेबाबु सैतानए ओज़ार जेतावए होए उयुँलाव मिताव येन दोव जेपैँज़्या। नोए ओयेन मनी भाःकिन ज़ सैःन्या उलिज़्याव। नोस साचो काता ज़ ओमाल्योए साचो पाँलाई मासहिधुव। नोए ओबानी धुत पाँन्या ओतावए धुत ज़ पाँज़्या। है जैद नो धुत पाँज़्यावराए याबाबु ज़। ४५खाली डा साचो डापाँज़्यावए डालाई जेयुँ माहुबे। ४६जेनी डालाई पापी थःरैन्या सु उलिज़्याव? डा साचो डापाँकिन कै जैद डापाँत जेयुँ ओमाहुपुज़्याव? ४७परमेस्वरए उमीराए ते परमेस्वरए ओपाँ ज़ थैज़्यार। जे ते परमेस्वरए उमीर जेमातावए ओपाँ ब जेमाथैधुइ।”

अब्राहामकिन येसु घ्योःव

४८हाःत ज़ यहूदीराए येसुलाई, “नँलाई प्राइँए ज़ सामरी

है यादींज्याव ते साचो ज़ ओल्यो! नँलाई माचाव पुरूसए क्योःद ओनैनैज्याव मिताव ब गेरँःनिज्या,” है यादोक ते, ४६येसुए, “जे कै जैद डाक्याँत माचाव पुरूस जेरँःज्याव? डा छैँव परमेस्वरए ओमान नैद डाएज्या। जे ते डालाई डापाहा भाःद जेयाँज्या। ५०हैदी ब डा ते डामान डामाखिमे। डा डाय़ेनर छचानिद डालाई मान याज्याव छुत तोबो लिज्या — नो परमेस्वर ज़। ५१जेलाई साचो है डादाचिज्या, डा डापाँ भैःद दोज्याव मिँ खर्क ज़ सिन्या माले,” है ओरादोक ते, ५२नो यहूदीराए भन, “अब ते नक्याँत माचाव पुरूस चरिद उलिज्याव साचो ज़ गेथःरैके। अब्राहाम गेपुर्खा ब सिके, अगमबक्ता भरी ब सिकेर। नँ कै जैद ‘डापाँ भैःद दोज्याव मिँ खर्क ज़ सिन्या माले’ है नलिज्याव? ५३काता, नँ सिद बाव गेपुर्खा अब्राहाम सोनो अगमबक्तराकिन ब घ्योःव नलिज्याव रो? नँ काता नसम्जिज्याव?” है यादोक ते, ५४येसुए, “डा डानी ज़ सघ्योःसिउ डापैकिन डामिन अनाकलाव ज़ ताज्या। खाली डालाई सघ्योःज्याव डाबाबु परमेस्वरए ज़। नोलाई जे मनी

‘गेपरमेस्वर ज़’ है जेदोज्या। ५५खाली जे परमेस्वरलाई ते खर्क ज़ जेमासरेसे, डा ते ड़ासरेस्ज्या। डा होलाई ड़ामासरेसे है ड़ालिकिन, डा मनी जे मिताव धुत पाँज्याव ज़ थंरिन्या ड़ाले। डा होलाई ब ड़ासरेस्ज्या, ओपाँ ब भैःद ड़ादोज्या। ५६जेपुर्खा अब्राहाम मनी आव ड़ाबेलार सैद उयुँर होलाँ ताके, रँःद खुसी ब ताके।”

५७हाःत ज़ यहूदीराए, “नँ पचास बर्स मायोःताव मिँए कै जैद ‘अब्राहामलाई ड़ारँःके’ है नलिज्याव?” है यादोक ते, ५८येसुए, “जेलाई साचो है डादाचिज्या, डा अब्राहाम ओमाजर्मिद ड़ादाकिन ज़ ड़ालिज्या,” है ओरादोव प्राइँना, ५९नोराए भन लुँर तीद येसुलाई भेःव पैकेर। हाःत ज़ येसु ध्यान भिमनी अलगज़ा पुलुस्द बाके।

### येसुए उमी मारैःवलाई ओसगराँव

येसु येमत ओबाज्याक तोबो जर्मननी ज़ उमी मारैःवलाई रँःक्यो। २नाःत ज़ उसिसराए, “गुर्बा, आव उमी मारैःव सुए ओदोव पापए अइ ओताव? ओल ओदोवए सँ ओबाबु ओआमाराए यादोवए अइ ओताव?” है यादोक ते, ३येसुए, “आव ओल ओदोव पापनी ब

माःक, ओबाबु ओआमाराए यादोव पापनी ब माःक। परमेस्वरए ओसक्ती ओक्याँत सरैःन्याए जूनी अइ ओताव ची। ४आव पलाँव बेला उलिज़्याक ज़ डालाई परीज़्यावए ओयेन गे दाव ताके। चुम चुमो ओतावकिन ते सुए ज़ येन मादोधुव। ५आव मानुवात डालेवा भरी, मानुवाताव ज़गै डा ज़,” है दाद, ६येसुए नामक तिल्द, गम मुछिद, नो उमी मारैःवए उमीत थीदद्याद, ७“आव नमीताव हिला सिलोआम दहल च्यानाके,” है दाद परींक्यो। (सिलोआमए ओअर्थ परींसिउ।) नो दहल बाद उमीताव हिला ओच्याव प्राइँना उमी रैःके। ८निताव रँःद ओनाखार जीलावर सोनो डादाकिन न्निद ओडासिज़्याव रँःज़्यावराए, “आव ते नो डादाकिनकाव न्निज़्याव मिँ ची सानी!” है लिकेर। ९ख्वाराए फरी, “हैज़, आव हो ज़,” है लिकेर। ख्वाराए फरी, “आव हो माःक, नो उमी मारैःवस जेसोबोरोल्ज़्याव ताखेहो,” है लिकेर। नो उमी मारैःज़्यावए फरी नो यापाँ थैद, “डा हो ज़ ब्याँ,” है ओरादोक ते, १०नोराए, “हुकी, नँ नमी कै जैद ओरैःव की?” है यादोक ते, ११नोए, “येसु है यादोज़्यावए हिला जैद डामीत थीदद्याद सिलोआम दहल

च्यानाव परींनाक्यो। नल बाद डाच्याव प्राइँना रँःधुन्या डाताके,” है यादोक्यो। १२नोराए, “आव है नलिज़्याव मिँ काना ओबाव?” है यादोक ते, “माँ, डा ते डामासैँए,” है यादोक्यो।

### फरिसीर उमी गराँवस यापाँव

१३हाःत ज़ नोराए उमी गराँवलाई फरिसीराए ल्योक लाँकेर। १४येसुए नोलाई उमीत हिला थीदद्याद रँःधुन्या ओजैव न्नासिन्या छचाम ओल्यो। १५नो फरिसीराए मनी, “नँ कै जैद रँःधुन्या नताव?” है यादोक ते, नोरालाई मनी नो रँःधुन्या तावए, “होए डामीत हिला थीद ओयाँव, डाच्याव प्राइँना रँःधुन्या डाताके,” है यादोक्यो। १६नलाव फरिसीर ख्वा ख्वाराए नो ओपाँ थैद, “आव सगराँज़्याव मिँ परमेस्वरनी हुव ते माःक, मानी न्नासिन्या छचामकाव येन मादान्या कानुनलाई माख्याखेहो,” है लिकेर। ख्वाराए फरी, “नो मिँ पापी ताकिन इताव अचम्बलाव येन कै जैद ओदोधुरिज़्याव?” है लिद या याल माखैकेर।

१७नोराए उमी गराँवलाई, “नँ नमी सगराँदद्याज़्यावलाई किताव नडम्सिज़्या?” है यादोक ते, नोए,



“नो अगमबक्ता ज़,” है यादोक्वो। १८नो यहूदीराए यास्रेरराए, “आव मिं ते ड़ादा उमी मारैःव ओल्यो माताखेहो,” लिद नोए ओपाँ मापतिकेर। है जैद ओबाबु ओआमानीलाई याल्योक खुल्द, १९“आव जर्मननी ज़ उमी मारैःव है यादोज़्याव जिनज़ा रो? निताव ओल्यो ताकिन कै जैद रँःधुन्या ओताव?” है यारादोक ते, २०ओबाबु ओआमानी, “हैज़, आव गिनज़ा ज़, जर्मननी ज़ उमी मारैःव ओल्यो। २१खाली कै जैद रँःधुन्या ओताव, सुए ओजैव गिन गिन्मासैए। ओललाई ज़ है दोचिके, नो लुज़ा माले, ओल ज़ पाँधुन्या ले,” है यारादोकिनी। २२नोनी यहूदीराए यास्रेरराए छ्याचेए नितावनी निपाँव। नो स्रेरराए ड़ादा ज़, “जोए ‘येसु परमेस्वरनी बाँचैना हुव खीस ज़’ है लिज़्या, होलाई धर्मसास्त्र फ़िमनी पलेःन्या,”<sup>†</sup> है यालिज़्याव। २३है जैद ज़ नो ओबाबु ओआमानी, “नो लुज़ा माले, ओललाई ज़ है दोचिके,” है निरादोव।

### उमी गरॉवए यहूदीराए यास्रेररालाई जवाप ओरायो

२४नकिन नो यहूदीराए यास्रेरराए फरी ब नो उमी गरॉवलाई याल्योक

खुल्द, “नो मिं ते पापी ची लिन्या गे गेसैँज़्या। कै जैद नँ ‘परमेस्वरए ओसगरॉनाव’ है नमालिधुज़्याव?” है यादोक ते, २५नोए, “डा नो मिं पापी उलिज़्याव सैँ ओमालिज़्याव लिन्या डामासैँए। तोबो वाज़ ड़ासैँज़्या, ड़ादा मारैःधुन्या ड़ाल्यो, अब रँःधुन्या ड़ाताके,” है ओरादोक ते, २६फरी ब नोराए, “नोए नँलाई कै कै जैद रँःधुन्या ओजैनिउ?” है यादोक ते, २७नोए फरी, “है दाव ज़ ड़ानैचिज़्या सानी, जेमाथैधुइ रो? तोबो पाँलाई खा ची है दान्या, सैँ जे मनी उसिसर जैसिउ जेपैँज़्याव?” है ओरादोक ते, २८नोराए थल्द, “नँ ची होए उसिस ते, गे ते मोसाए उसिसर ची। २९मोसास परमेस्वर ओपाँव ते गेसैँज़्या, आव मिं सुए ल्योनी हुव गे गेमासैँए,” है दोकेर। ३०हाःत ज़ नो उमी गरॉवए, “आव ते बनै अनवाज्यासो पाँ ज़ जेपाँके। ड़ालाई रँःधुन्या ओजैनाज़्यावत ब कै जैद आनी हुव लिन्या जेमासैँज़्याव? ३१परमेस्वरए पापीराए यापाँ माथैव, ओमान नैदचाज़्याव उयुँलाव मिताव येन दाज़्यावराए यापाँ वाज़ थैज़्याव लिन्या प्राइँए गेसैँज़्या सानी। ३२आव संसार ओतावकिन जर्मननी ज़ मारैःधुज़्यावलाई रँःधुन्या जैक्यो

<sup>†</sup>६:२२ छुत बुफ़िन्या — समाजनी पलेःद बातड जैन्या।



लिन्या आःपै सुए ज़ गोमाथैताए। ३३ नो मिँ परमेस्वरनी हुव ओमाताव ताकिन, कै जैद निताव येन ओदोधुरिज़्याव?” है ओरादोक ते, ३४ नोराए भन नोलाई, “नँ पापल जर्मिद नपाप भुगिउ प्रैक्याए गेलाई पैव नपैज़्याव रो?” है लिद नोलाई धर्मसास्त्र भिमनी हुतैद पले-केर।

### साचो मार्रें:धुन्यार

३५ येसुए नोलाई पले-केर दी लिन्या थैद नोस दैसिनाद, “मिँ मिन्सिउलाई नयुँ माहुप्य्या?” है ओदोक ते, ३६ “नो मिँ मिन्सिउ है नलिज़्याव सु ओताव, प्रभु? डा नोलाई डार्रें:किन डायुँ हुप्य्या ले,” है ओदोक ते, ३७ येसुए, “नो मिँलाई रँ:द ब ननै, डा नँस पाँज़्याव ब हो ज़,” है ओदोव प्राईना, ३८ नो मिँ ओड़ाक फुलुप्सिद, “प्रभु, डा नँलाई डायुँ हुप्ये,” है दोक्यो।

३९ हा:त ज़ येसुए, “काता ज़ मासैन्यार मार्रें:धुन्यार सैन्या रँ:धुन्या ओतारक, फरी ‘गेसैज़्या गेर्रें:ज़्या’ है लिज़्यावर काता ज़ मासैन्या छाम छामोर ओतारक लिद आव मानुवाताव मिँरालाई डाराछयानिहुव,” है लिके। ४० नक लिज़्याव फरिसीराए थैद, “हुकी, गेलाई मनी गेमी मार्रें:व मितावर नजैसिज़्याव रो?” है यादोक ते,

४१ येसुए, “जे साचो काता ज़ मासैन्-धुन्या मार्रें:धुन्यार जेताव ताकिन जेखत माल्योर तान्या जेल्यो। खाली जे ‘सैद रँ:द ज़ गेदोऽ्या’ है जेलिज़्यावए जेखत ल्योर जेताके,” है यादोक्यो।

### येसु बेधाराए चाव यार्गे गावला

१० नकिन येसुए फरी, “डा जेलाई साचो है डादाचिज़्या, बेधा खोरल यामनी मापसिद तँनी पसिज़्याव ते चोर दाँका ज़ ताऽ्या। २ यामनी पसिज़्याव ते साचो बेधाराए यागावला ज़। ३ याम गुऽ्यावए नोलाई याम फैदिऽ्याव। नो गावलाए फरी ओबेधारालाई यामिन हाइए हाइए ओराक्कि नोर ओर्गा थैद ओल्योदा याहुवत खोरनी याहाइऽ्याव। ४ प्राई पाखात यापुलुसोत फरी ओल याऽा याऽा बाऽ्या। बेधार फरी ओर्गा सरेस्द उछीं उछीं हुऽ्यार। ५ नो बेधार यामासरेसो मिँए उछींत ते माबार। ओर्गा यामासरेसोए भन छे-द धों:ऽ्यार,” है लिद यासथैक्यो।

६ येसुए आव बेधा गावलाए घर्ती भा:द ओरासथैव पाँ नो थैऽ्यावराए ओअर्थ मातीधुकेर। ७ है जैद येसुए फरी है यादोक्यो, “डा जेलाई साचो है डादाचिज़्या, नो बेधाराए याखोरलाव याम डा ज़। ८ डाकिन डादा हुव भरी

जाँकोसै चोरर दाँकार वाज़ याल्यो। है जैद बेधाराए नोराए यार्गा माथैकेर। ९साचो ग्राम ते डा ज़। डाल्योनी पसिज़्यावर प्राइँ बाँचिन्या लेर। आदा होदा लिद चाव चरनल लाव ब दैन्या लेर। १०चोरए ओयेन ते कुन्या, सैःन्या, खेमन्या वाज़ लिज़्या। डा ते डाबगालराए बनै धोल पोगोल जुनी ओदैरक लिद डाहुव ची।

११“डा ज़ बेधाराए चाव यार्गे गावला। चाव गावलाए ओबेधाराए जूनी उजिउ भाःदचान्या ब तयार ज़ ताज़्या। १२बाहोज्या गावला ते, बेधार ओल उमीर यामातावए प्रर याहुज़्याव रँःद बेधार रास्द धोंःद बाज़्या। है जैद प्रर हुद बेधारलाई छुपिद चितराँ पुतराँ याराजैज़्यार। १३नो बाहोज्या वाज़ ओतावए बेधाराए ल्योदा उयुँ ज़ माले। १४डा फरी चाव यार्गे गावला ज़। किताव डा डाबेधारलाई डारासरेस्ज़्या, सोनो या डालाई सरेस्नाज़्यार, १५हिताव ज़ डाबाबुए डालाई सरेस्नाज़्याव, सोनो डा मनी ओललाई डासरेस्ज़्या। है जैद नो डाबेधाराए जूनी तछा डाजिउ ब डाभाःरिज़्या। १६आव खोरल माल्यो छुत डाबेधार ब लिज़्यार। नोरालाई मनी तछा डारारैरिज़्या। नोराए मनी डार्गा याथैवत, बगाल ब तोबो वाज़ तान्या ले, गावला मनी

तोबो वाज़ तान्या ले। १७डाबाबुए डालाई मया दाँज़्याव, काराव ल्यो ताकिन डा डाबेधाराए जूनी डाजिउ भाःद, नो डापोहोन फरी रैन्या डाले। १८नो डापोहोन डानी सुए ज़ मालाँधुर, डा डायुँ स्यानी ज़ डाभाःरिज़्या। भाःन्या, सोवोल्न्या डा डाकुइत ज़ लिज़्या। निताव येन दान्या परमेस्वर डाबाबुए ज़ डालाई याद नैनाव।”

१९आव पाँत यहूदीर या याल माखैनाकेर। २०ख्वाराए, “आवलाई माचाव पुरुसए क्योःद बोःलैद नैव। काराव नितावए ओपाँ जेथैज़्याव?” है लिकेर। २१ख्वाराए फरी, “इताव पाँ कै जैद बूलिउ मिँए ओपाँ ओताज़्याव? माचाव पुरुसए सुलाई ज़ रँःधुन्या माराजैव,” है लिकेर।

### येसुलाई सरेस्ज़्यावर

२२हाः बेलाक यरूसलेमलाव ध्यान फ़िमलाई चोखोइन्या पर्ब हुद उलिज़्याव। नो पर्ब सालकाव तखेप युँदाक ओताज़्याव। २३नो बेलाक येसु ध्यान फ़िम जीलाव सोलोमन मैराल उलिज़्याक, २४यहूदीर ओल्योक गुरिगाँ हुद, “नँ साचो ख्रीस ताकिन गेलाई छर्लङ्ग ज़ है दासिके। खा पै गेलाई आदा तान्यानी होदा तान्याल ननैसिरिज़्याव?” है यादोक ते, २५येसुए, “जेलाई डादाकिन ज़

है दाव ज़ डानैचिज़्या, हितावत ब जेयुं ज़ माहुबे। डाबाबुए उमिननी डादोज़्याव येनराए ज़ 'डा हो ज़' लिद सतैज़्यार। २६खाली जे डाबगाललावर जेमातावए ज़ डालाई जेयुं माहुबे। २७डाबगाललाव बेधाराए ते डार्गा थैज़्यार। डा नोरालाई डारासरेऽज़्या, नोर मनी डाछींत हुज़्यार। २८डा नोरालाई अजम्बरी जुनी डाराएज़्या। है जैद नोर खर्क ज़ कै मै तान्या मालेर। डाल्योनी सुए मनी नैद लाँधुन्या मालेर। २९नोरालाई डाकुइत याज़्याव परमेस्वर डाबाबु बनै ओसक्ती ल्यो प्राइरानी घेप्पा लिज़्या। है जैद नोए ओल्योनी ब सुए ज़ नैद लाँधुन्या मालेर। ३०डाबाबुस गिन तोबो ज़ गिन्लिज़्या।”

### यहूदीराए येसुलाई भेःव यापैव

३१यहूदीराए आव पाँ थैद यारिसए लुँर तीद येसुलाई भेःव यापैज़्याक, ३२येसुए, “डाबाबुए ल्योनी चाव येनर जेड़ाक कुधु ज़ सतैद डायचिके, नो भरिनी काताकाव येनए उजूनी लुँए भेःव जेपैज़्याव?” है ओरादोक ते, ३३यहूदीराए, “नँलाई चाव येनए जूनी भेःव गेपैज़्याव माःक, परमेस्वरए उमिन नबलेऽज़्यावए जूनी ची। नँ मिँ ताद कै जैद परमेस्वरस

सम सम नजैसिज़्याव?” है यादोक ते, ३४येसुए, “जेधर्मसास्त्रल परमेस्वरए है लिज़्या — ‘जे मिँ ईस्वर मितावर ज़।’ ३५धर्मसास्त्रलाव सर्सिउ पाँ अनाकलाव माले लिन्या जे मनी जेसैज़्या। है जैद परमेस्वरए ओल ओपाँ दैवरालाई ईस्वर मितावर ज़ है ओरादोकिन, ३६डाबाबुए डालाई खतैद आव मानुवात उपरीनावए, ‘डा परमेस्वरए ओज़ा ज़’ है डादाचिक, जे कै जैद ‘परमेस्वरए उमिन नबलेऽज़्या’ है जेदाँज़्याव? ३७डा डाबाबुए ओयेन डामादोज़्याव ताकिन जे डालाई जेमापतिनादी ब ताए। ३८फरी नो येन डादोज़्याव ताकिन डालाई जेमापतिनादी ब, डादोज़्याव येनत ते जेयुं हुबो ज़ परिके। हो ताकिन ची परमेस्वर डाबाबु डास लिद तोबो ज़ गिन्लिज़्याव सैद थःरैन्या जेले,” है यादोक्यो। ३९नोर भन नो पाँ थैद फरी ब येसुलाई क्योःव पैकेर। येसुए फरी नोराए ल्योनी छाँसिद याखानी ज़ पुलुस्द बाके।

४०नकिन येसु ननी पुलुस्द यर्दन भै होफताव यूहन्नाए डादा रीनी ओरासछैऽज़्याव पोड ज़ लिनाके। ४१नक मिँ येसुए ल्योक बनै माहोल्या हुद, “यूहन्नाए ते अचम्बलाव येनर



काता ज़ मादोव। हैदी ब आव मिँए उजूनी ओपाँव पाँ भरी साचो ज़ ओल्यो,” है लिद, ४२नलावर कुधु ज़ येसुलाई यायुँ हुप्के।

### लाजरस उसिस

**११** नाः बेलाक बेथानिया नाखारल तोबो लाजरस यादोज़्याव मिँ ओजोरो हुद थलिद उलिज़्याव। नो मिँ मरियम स़ोनो मारथानी निभाइ ज़। २नो मरियम ज़ छीनी येसुलाई उखँत मास थीदचाद ओचेमए सीदचाज़्याव। नो ओजोरो हुव लाजरस नोए ओभाइ ज़। ३नोए ओनानानी येसुलाई, “प्रभु, नयुँलाव लाजरस ओजोरो हुद थलिद ले,” है लिद तोबो सोर परीकिनी। ४येसुए नो सोर थैद, “आव जोरोए लाजरसलाई सिउका सिउ जैन्या माले, परमेस्वर डाबाबुए उमिन भन ज़ सघ्योःन्याए जूनी ची। डा ओज़ाए डामिन मनी भन ज़ घ्योःन्या ले,” है लिके।

५येसुए मारथा, मरियम स़ोनो लाजरसरालाई बनै मया ओरादोज़्याव। ६निताव ओजोरो उहुज़्याव सोर थैद ब हतप्त ज़ माबाद नो उलिज़्याव पोक ज़ अफ़ नेला लिके। ७नकिन येसुए उसिसरालाई, “गे फ़री यहूदियादा गेबा,” है ओरादोक ते, ८उसिसराए, “गुर्बा, ताला नलाव यहूदीराए नँलाई

लुँए भेःव यापैज़्यावत ब काराव फ़री नदा ज़ बाव नपैज़्याव?” है यादोक ते, ९येसुए, “तछात बाह घन्ता पलाँ ताज़्या। लाक बाज़्याव मिँ आव मानुवाताव ज़गै ओलस ओतावए कान्त ज़ मातुमे। १०रील बाज़्याव ते, ओलस ज़गै ओमातावए तुम्द पाज़्या,” है यादोक्यो। ११नकिन फ़री, “गेनै लाजरस घेप्पा ड़लत बाद ले, डा नोलाई डासोचोइनारिज़्या,” है ओरादोक ते, १२उसिसराए, “प्रभु, अइज़ घेप्पा ड़लत उलिज़्याव ताकिन ते, जुनी ब गर्राया ज़,” है लिकेर। १३खास येसुए ते लाजरस उसिधुवए उजूनी ज़ ओपाँज़्याव, उसिसराए माबुभिद साचो ड़ल्द उलिज़्याव ज़ याजैज़्याव। १४है जैद येसुए छर्लङ्ग ज़ है यादोक्यो, “लाजरस सिधुके। १५खाली जे जेयुँ भन ज़ सुहुपदचान्याए जूनी हतप्त डामाबाव चाव ज़ ताके। अब ते हुचिके, लाजरसए ल्योदा गेबा,” है ओरादोक ते, १६दिदुमस यादोज़्याव थोमाए ओलसकाव येसुए उसिसरालाई, “दे च्याँःसिचिके, गेबा। गेलाई मनी ओलस ज़ यासैःसिकिन्दा सैःसिकेर ब!” है यादोक्यो।

येसु लाजरसए ओनाखारल ओबाव

१७येसु उसिसरास लाजरसए ओनाखारल याकेस्नाक, लाजरसलाई

खादरल याभाःव चार दिन ताके है लिन्या थैकेर। १८लाजरस ओनाखार बेथानिया यरूसलेमकिन सोंकिलो-मितरवा उलिज़्याव। १९निभाइ उसिउए मार्था सोनो मरियमनिलाई यहूदीराए कुधुए याराचिऊहुज़्याव। २०मार्थाए, 'येसु हुज़्या दी' लिन्या थैद मरियमलाई फिमक ज़ ख्यानैद येमड ज़ दैसिनाद, २१येसुलाई, "प्रभु, नँ नल्यो ताकिन ते डाभाइ सिन्या ओमाल्यो। २२हैदी ब आख मनी नँ परमेस्वरस जो ननिज़्या हो ज़ यान्या ले लिन्या डसैंज़्या," है ओदोक ते, २३येसुए, "नभाइ फरी ब सोन्या ले," है ओदोक ते, २४मार्थाए, "हैज़ प्रभु, परमेस्वरए मिँरालाई अजम्बरी जुनील ओरासोचोइव छचाम नो मनी सैसिद सोन्या ले," है दोक्यो। २५हाःत ज़ येसुए, "सिउरालाई सोचोइज़्याव ब डा ज़, अजम्बरी जुनी याज़्याव ब डा ज़। है जैद जोए डालाई उयुँ हुपज़्या, हो उसिदी ब फरी सैसिन्या ले। २६डालाई यायुँ हुपद बाँचिन्यार ते खर्क ज़ सिन्या मालेर। आव डापाँत नयुँ माहुपज़्या?" है ओदोक ते, २७मार्थाए, "हैज़ प्रभु, नँ आव मानुवात हरिज़्या है यालिज़्याव परमेस्वरए ओज़ा ख्रीस ज़ लिद डायुँ हुबो ज़ लिज़्या," है दाद, २८उफिमदा बाद ओबैनी मरियमलाई अलगज़ा

खुल्द, "गुर्बा आल हुद ले, नँलाई साप्निज़्याव," है ओदोव पाइँना, २९मरियम हतप्त ज़ च्याँःसिद दैसिनाके।

### येसुए सिउ लाजरसलाई ओजागैव

३०हाःपै येसु नाखारल ओमाहुताव, मार्थाए ओख्यानैव पोक ज़ उलिज़्याव। ३१नो फिमक लिज़्याव चिऊना हुव यहूदीर मरियम थर च्याँःसिद ओबाज़्याव रँःद, 'फरी खादरक ओघर्नाज़्याव ताक्या' लिद उछीं उछीं बाकेर। ३२मरियम येसुए ल्योक केस्द उखँत फुलुप्सिद, "प्रभु, नँ नल्यो ताकिन डाभाइ सिन्या ओमाल्यो," है दाद, ३३घर्के। उछीं उछीं हुव यहूदीर मनी ओलस ज़ याघज़्याव। येसुए निताव रँःद उयुँ बनै माचाव दाद, ३४"नोलाई काङ्क भाःद जेनेज़्याव?" है ओरादोक ते, "हुद चिऊके, प्रभु," है दोकेर। ३५हाःत ज़ येसु मनी घर्के। ३६नो रँःद नलाव यहूदीराए, "लाजरस बनै उयुँलाव मिताव मिँ ओल्यो," है लिकेर। ३७ख्वाराए फरी, "आव मिँ मारँःधुन्यालाई रँःधुन्या जैज़्यावए लाजरसलाई ओमाबाँचैधुव रो?" है लिकेर।

३८हाःत ज़ येसु उयुँर धो थाइव ताद खादरक बाके। नो खादर तोबो

पुप ओल्यो, ओयाःत बनै घ्योःव लुँ कसिउ उलिज़्याव। ३६येसुए, “नो कसिउ लुँ हाइचिके,” है ओरादोक ते, लाजरसए ओनाना मार्याए, “आवलाई गेगादैव चार दिन ताधुके, प्रभु। गेफैकिन उसी डर्न्या ले,” है ओदोक ते, ४०येसुए, “नँलाई नयुँ उहुष्किन परमेस्वरए ओज़गै रँःन्या नले है डादीव माःक रो?” है ओदोव प्राइँना, ४१उपुर्कावराए नो कसिउ लुँ हाइकेर। हाःत ज़ येसुए नमदा परमेस्वरए ल्योदा भाल्सिद, “अ परमेस्वर डाबाबु, नँलाई धन्याबाद लिज़्या, आव डाबिन्ती नथैधुके। ४२डापाँ भरी थैव ज़ ननैज़्या लिन्या डासैँज़्या। खाली आक लिज़्याव मिँराए आव डापाँ थैद नँ ज़ नपरीनाव घथःरैनारक लिद है डादीँज़्या,” है दाद, ४३येसु बनै चोइस क्रिद, “लाजरस, ननी पुलुस्द हुन्के,” है ओदोव प्राइँना, ४४नो सिउ लाजरस ओडैनी उखँड पै लुम्बैसिउ क्वारास पुलुस्के। हाःत ज़ येसुए नक लिज़्यावरालाई, “ओक्वार पलाःदद्याद बाव एचिके,” है यादोक्यो।

४५निताव रँःद नो मरियमलाई चिऊना हुव यहूदीराए मनी कुधुए ज़ येसुलाई यायुँ हुप्के। ४६ख्वाराए फरी येसुए ओदोव येन भरी रँःद फरिसीरालाई है यारादोनाकेर।

### येसुलाई सैःन्या गुमुस्ता

(मत्ती २६:१-५; मार्कूस १४:१-२;

लूका २२:१-२)

४७नो फरिसीर सोनो मुख्या पुजारीराए घ्योःव कचरी जैद, “गे कै लिन्या ओताव? आवए ते कुधु अचम्बलाव येनर दोज़्याव। ४८नोलाई मावैँद दोव गेएकिन, मिँ भरी ओपोःस ज़ नोलाई यायुँ हुप्द ओल्योदा बान्या लेर। नदा याबाकिन रोमी सरकारए उसिपाईर हुद गेध्यान फ़िमलाई तैःदद्याद गे यहूदीरालाई मनी खेमन्या ओछचास लिज़्या,” है लिकेर। ४९हाःत ज़ कैयाफा यादोज़्याव हो साललाव प्रधान पुजारीए, “जे काता ज़ मासैँन्यार जेलिज़्या। ५०गेदेस भरी उमिन ओमाज़्याव देखा बुरू प्राइँए जूनी तोबो मिँ सिन्या लेखा लिज़्या लिन्या जेमासैँए रो?” है लिके। ५१नोए निताव ओपाँव ओलनी ते माःक। येसुए यहूदी जातलाव मिँराए जूनी उजिउ भाःद याएरिज़्याव लिन्या परमेस्वरए डादा ज़ नो प्रधान पुजारीए ओयाःत भाःद ओयोनी ज़ ओपाँव ची। ५२येसुए उजिउ ओभाःरिज़्याव यहूदीराए जूनी वाज़ माःक, संसार भरिलाव काना कुनीड लिज़्याव परमेस्वरए उमिनतावरालाई तोबो ज़ जैन्याए जूनी ब ओल्यो। ५३हो

छचामकिन ज़ येसुलाई कातानी सैःन्या लिद गुमुस्ता दोनाकेर।

५४ है जैद हाःकिन येसु यहूदियाल मासरैःसिद ननी पुलुस्द उसिसरास बन छचोकाव एफ्राइम यादोज्याव नाखारल लिनाकेर। ५५ हाः बेलाक यहूदीराए यामानिज्याव निस्तार पर्व हुनाद उलिज्याव। है जैद नो पर्वए जूनी मिंर ड़ादा ज़ नाखार नाखारनी यरूसलेमल बाद हुसिद याचोखोइसिनाज्याव। ५६ नोर ध्यान फ़िमल याहुवत येसुलाई मारैःद या याल ज़, “जे कै जेलिज्या, नो मिं आव पर्वल जाँ ओमाहुरिज्याव सा,” है लिकेर। ५७ फ़रिसीर सोनो मुख्या पुजारीराए येसुलाई क्योःन्याए जूनी ड़ादा ज़ नल हुवरालाई, “येसुलाई जेरैःकिन गेलाई है दासिच्यो,” है दाद यारानैज्याव।

### मरियमए येसुए उखँत मास थीद ओयो

(मत्ती २६:६-१३; मर्कूस १४:३-६)

**१२** येसु निस्तार पर्वकिन छ दिन ओड़ाल बेथानियाल बाके। नल नो सिउनी ओसोचोइव लाजरसए ओल्योक ज़ लिनाके। २नोराए येसुए उजूनी रिमकाव ज़्यावर

थिक थाक जैद मारथाए ज़्यावर भाःद ओराएज्याव। लाजरस फरी येसुस ज़्यान्याए जूनी चुसिद उलिज्याव। ३हाः बेलाक मरियमए बनै ओएः ल्यो चाव सी ड़रो जतामसीए मास तज्या-वा रैद येसुए उखँत थीदद्याद ओचेमए सीदिक्यो। फ़िम भरी ज़ बनै चाव सी फाँ फाँ ड़र्के। ४नाःत ज़ छीनी येसुलाई धोका याज्याव उसिस यहूदा इस्करियोतए, ५“बुरू आव मास सोंसय चाँदीए सिक्काल यो-द काता ज़ माल्योरालाई भाःद ओराएकिन तान्या ओल्यो,” है लिके। ६खाली नोए माल्योराए जूनी उयुं नाद है उलिज्याव ते माःक, ओल कुन्याए जूनी है उलिज्याव ची। याखार्ताव पैसा ओल ज़ ओनैज्याव, ननी कुव येन ओदोज्याव। ७हाःत ज़ येसुए, “घदोज्यावक। ड़ालाई गादैन्या छचामकावए जूनी सामा दाद ओनैव ची। ८काता ज़ माल्योर ते जेस एकतार ज़ लिज्यार, डा ते जेस एकतार लिन्या ड़ामाले,” है यादोक्यो।

९येसु नक लिज्या दी लिन्या थैद नजीलाव यहूदीर कुधु ज़ ओल्योक हुकेर। नोर येसुए उजूनी वाज़ याहुव माःक, नो सिउनी ओसोचोइव

लाजरसलाई चिऊन्याए जूनी ब हुद यालिङ्याव। १० है जैद ज़ मुख्या पुजारीराए लाजरसलाई ब सैःव पैकेर। ११ काराव ल्यो ताकिन येसुए नोए ओक्याँताव ओदोव येननी ज़ यहूदीर कुधु ज़ मुख्या पुजारीरालाई रास्द येसुलाई यायुँ हुप्नाके।

येसुलाई परमेस्वरए उमिनताव राजा  
याजैव

(मत्ती २१:१-११; मर्कूस ११:१-११;  
लूका १९:२८-४०)

१२ हो पराःती नो पर्वत हुव माहोल्थार 'येसु यरूसलेमल हुङ्या दी' लिन्या थैद, १३ नोराए खजुर सीए ओस्यावलार रैद येसुस दैसिनाद,

“होसन्ना! परमेस्वरए उमिनत हुव

इसाएलीराए याराजा  
धन्याकाव ओताक,”

है लिद किकेर। १४ येसु तोबो गधाहाए ओबछेरा चेप्ट उहुङ्याव। नोए उजूनी धर्मसास्त्रल इताव सर्सिउ उलिङ्याव, १५ “ताछे-नी सियोनए ओज़ा, †

नराजा गधाहाए ओबछेरा चेप्ट  
हुङ्या।”

१६ नो बेलाक येसुए उसिसराए नो पाँर माबुभिधुकेर। येसु स्वर्गत ओल्द

ओबाव छीनी वाज़ नो धर्मसास्त्रलाव सर्सिउ पाँर चेतैद ‘नो पाँ गेसयो-धुव ची ओल्यो’ लिन्या सैकेर।

१७ नो माहोल्थारानी जो जोराए येसुए लाजरसलाई खादरनी क्रिद सिउनी ओसोचोइव रँःद नैर, होराए प्राइँलाई ज़ है यारादोङ्याव। १८ होए उजूनी ज़ येसुए नाःल्दिउ येन ओदोव ओल्यो लिन्या थैद निताव ल्यो माल्यो मिँर ओलस दैसिहुकेर। १९ निताव रँःद फरिसीर या याल, “आव मानुवाताव मिँ भरी ओपो-स ज़ नोए ओपाँत बाङ्यार, गे ते अबकिन नोस कातानी ज़ गेमाधुके ब,” है लिकेर।

येसु उसिन्याए जूनी इ़ादा ज़  
ओपाँव

२० नो पर्व मानिना हुवर रूवार ग्रीक यारादोङ्यावर मनी याल्यो। २१ नोर गालीललाव बेथसेदा नाखारलाव फिलिपए ल्योक बाद, “अ स्मेर, गे येसुस तखेप दैसिउ गेपैङ्या,” है यादोक ते, २२ फिलिपए नो पाँ फरी अन्द्रियासलाई मनी है दोक्यो। है जैद नोनी नेब्लो ज़ येसुए ल्योक बाद नो पाँ है दोकिनी। २३ नाःत ज़ येसुए नक लिङ्यावरालाई, “अब ते परमेस्वरए

† १२:१५ छुत बुभिन्या — यरूसलेमलाव मिँर।

१२:१३ भज ११८:२५-२६ १२:१५ जक ६:६

डा मिं मिन्सिउए डामिनलाई सघ्योःदयान्या बेला हुके। २४ डा जेलाई साचो है डादाचिऱ्या, तोबो तामए ओसै गमल बाद ओमासिवा पै हाःकाव ज़ लिऱ्या। गमल बाद उसिउत वाज़ कुधु ओसै भाःऱ्याव। २५ हिताव ज़ जोए उजिउए मया दोऱ्याव, होए उजुनीलाई समैऱ्याव। फरी जोए आव जुनील उजिउए मया मादोव, होए उजिउलाई अजम्बरी जुनीए जूनी जोगोइद नैऱ्याव। २६ जोए डासेवा दोव पैऱ्याव, हो डाछींत उहुक। हो ताकिन ची डा जोड जोड डाताऱ्या, नो डासेवा दोऱ्याव ब होड डास ज़ तान्या ले। जोए डासेवा दोऱ्याव, होलाई परमेस्वर डाबाबुए मनी ओमान नैदयान्या ले,” है यादोक्यो।

२७ हाःत ज़ फरी, “डा आख बनै धो थाइव ताद डाले। डा कै लिन्या? सै डाबाबुलाई, ‘अ बाबु, आव डाक्यांत हुरिऱ्याव दुखरानी जोगोइनाके,’ है दान्या ओताव? हिताव ते माता, डा नो दुखर सहिद सयोःना डाहुव ची,” है लिद, २८ “अ बाबु, अब ते घ्योःव नमिन सरैःके,” है लिद ओपोंखारिउ प्राइंना नमतिन तोबो गाए, “डामिन ते डासरैःधुके,

फरी भन ज़ सरैःन्या डाले,” है उलिऱ्याव थास्के। २९ नक लिऱ्याव माहोल्याराए नो गा थैद ख्वाराए ‘नम गर्जिऱ्या’ है लिकेर, ख्वाराए फरी ‘येसु परमेस्वरए ओचाकऱ्यास ओपांऱ्याव ची’ है लिकेर। ३० हाःत ज़ येसुए, “आव जेथैव गा डा डाजूनी माःक, जे डालाई सरैःन्याए जूनी ची। ३१ अबकिन आव मानुवाताव मिंर फाल्सिरिऱ्यार, यासैर सैतान मनी ख्यासिद उमिन मारिऱ्या। ३२ सोनो डा आव नामनी छीसिद डातङ्गैसिउत प्राइं मिंरालाई डाल्योदा डारारैरिऱ्या,” है यादोक्यो। ३३ नो है ओल्यो भरी ओल उसिरिऱ्यावए जूनी ज़ ओपांव।

३४ नो माहोल्याराए, “धर्मसास्त्रल गेचिऊक नो बाँचैना हुरिऱ्या है यालिऱ्याव ख्रीस खर्क ज़ सिन्या माले लिन्या लिऱ्या। नँ कै जैद मिं मिन्सिउ तङ्गैसिद सिरिऱ्या है नलिऱ्याव? नो मिं मिन्सिउ सु?” है यादोक ते, ३५ येसुए, “अभ छचावा पै वाज़ डाज़गै जेखार्ल रहिरिऱ्या। नो ज़गै जेखार्ल ओलेवा भरी नो बेला ताचुकैच्यो, मानी चुम चुमोल जेपरिया। नल जेपरिकिन ‘आदा डाबाऱ्या’ लिन्या ब सैन्या जेमाले। ३६ है जैद नो ज़गै उलिऱ्याक ज़ ज़गैवलाई जेयुं उहुप्क।

हो ताकिन ची ज़गैवए ओथोर  
जेतारिज़्या,” है दाद येसु ननी पुलुस्द  
समैसिनाके।

### यायुँ माहुज़्याव यहूदीर

३७ येसुए मिँराए ड़ाक अचम्ब  
अचम्बलाव येनर दाद ब नोराए  
यायुँ ज़ माहुक्के। ३८ ननी ज़ यसैया  
अगमबक्ताए ओसरो यो.के। नोए  
ओसरो आव ज़,

“प्रभु, गेरासथैव पाँत

सुए यायुँ ज़ माहुक्के।

परमेस्वरए सतैँद ओरायो

ओसक्तीलाव येनर ब

सुलाई ज़ माताके।”

३९ नितावनी ज़ नोराए यायुँ माहुक्के।  
यसैयाए फरी ब तोथोल अइ लिद सर्द  
नैव,

४० “परमेस्वरए नोरालाई मुन्दुक्यासो

जैद यानैव,

यायुँ ब बनै खाव जैद नैद यायो।

है जैद ज़ यामी लिज़्यावत ब

मारैःधुर,

थैद ब यायुँल मातीधुर।

ननी ज़ नोर डाल्योदा यायुँ फकैँद

सगराँसिना माहुर।”

४१ यसैयाए ड़ादा ज़ ख्रीसए ओज़गै

रँःद आव पाँ भरी ख्रीसए उजूनी ज़  
सर्द ओनैज़्याव। ४२ हैदी ब यहूदीराए  
यासेरर कुधुए यायुँ हुक्के। खाली  
‘धर्मसास्त्र फ़िमनी फरिसीराए  
पले.सिज्या’<sup>†</sup> लिद याछ्याचेए पाखात  
मापाँधुकेर। ४३ नोराए परमेस्वरनिकाव  
दैन्या स्याबासकिन मिँनिकाव दैन्या  
स्याबास घ्योःव रँःकेर।

४४ हाःत ज़ येसुए बनै चोइस अइ  
लिद यासथैक्यो, “जोए डालाई उयुँ  
हुपज़्या, होए डालाई वाज़ माःक,

डालाई परीज़्यावलाई मनी उयुँ  
हुपज़्या। ४५ हिताव ज़ फरी डालाई

रँःज़्यावए डालाई परीज़्यावलाई ब  
रँःज़्याव। ४६ डा आव मानुवाताव

ज़गै ताद डाहुके। डालाई यायुँ  
हुप्यार चुम चुमोल तान्या मालेर।

४७ फरी डापाँ थैद माभैःज़्यावरालाई  
डा याखत पले.दद्याव मापरिए। डा

आव मानुवाताव मिँरालाई याखत  
पले.दद्याद सजा याना डाहुव माःक,

बाँचैना डाहुव ची। ४८ हैदी ब डालाई  
सोद डापाँ माभैःज़्यावरालाई याखत

सतैँदयान्या डापाँ ज़। नो डापाँ  
ओमाभैःवए, फाल्सिन्या छ्याम

ननी ज़ फाल्सिरिज़्या। ४९ नो डापाँ  
डानी सिजैँद डापाँव माःक, डालाई

<sup>†</sup> १२:४२ यूह ६:२२ चिऊन्या।

१२:३८ यसै ५३:१ १२:४० यसै ६:१०

परींज्याव डाबाबुए 'आव पाँनिके' है ओदाँव ची। ५० ओल डालाई पाँव उपरींनाव भरी अजम्बरी जुनी यान्या लिज्या। है जैद डापाँज्याव भरी परमेस्वर डाबाबुए है ओदाँव वाज़ डापाँज्या।”

येसुए उसिसराए याखँर हुर्द ओरायो

**१३** निस्तार पर्बए ओड़ादा येसुए, 'आव मानुवानी पुलुस्द परमेस्वर डाबाबुए ल्योदा बान्या बेला ताके' लिन्या सैक्यो। ओमासिवा पै आव मानुवाताव ओल उमींरालाई मया दाव ज़ ओरानैज्याव।

२हो छचाम रिमक येसु उसिसरास ज़्यावर याज़्युज्यावकिन डादा ज़ सिमोनए ओज़ा यहूदा इस्करियोतए उयुँल सैतानए येसुलाई धोका यान्या युँ जैद नैद ओएज्याव। ३हाःत ज़ येसुए उयुँल, 'परमेस्वर डाबाबुए प्राईं डाकुइत ज़ याद नैनाव, ओल्योनी ज़ डाहुके, फरी ओल्योदा ज़ डाबारिज्या' है लिन्या ओसैंज्यावए, ४उसिसराए याड़ाक नो ज़्यान्यार याज़्युज्याव बेलाक ज़ याखानी च्याँःसिद ओबर्की हाइद रूमाल भिरिसिद, ५तोबो जाल री भाःद, उसिसराए याखँर हुदर्चाद नो उभिरिसिउ रूमालए ज़ याखँर सीद ओराएज्याव। ६है जैद याखँर हुरे हुरे सिमोन पत्रुसए ल्योक उहुवत

पत्रुसए, “प्रभु, नँ कै जैद इतावए डाखँ हुदर्चाव नपैंज्याव?” है ओदोक ते, ७येसुए, “आव डादोज्याव येन आख ते नमासैंए, छीनी नसैंया,” है ओदोक ते, ८फरी ब पत्रुसए, “नँ डाखँ खर्क ज़ हुदर्चान्या माताए,” है ओदोक ते, येसुए, “नँ नखँ हुदर्चाव भैःद नमायाँकिन नँ डासकाव तान्या नमाले,” है दोक्यो। ९हाःत ज़ सिमोन पत्रुसए, “हो ची ताकिन्दा प्रभु, डाखँ वाज़ माःक, डाकुइर डाडैर ब हुदर्चाव ताके,” है ओदोक ते, १०येसुए, “हुर्सिउ मिँ ओक्याँ भरी छैँव ओतावए उखँ वाज़ हुदर्चाकिन ताए। जे भरी प्राईं छैँवर ज़ जेलिज्या। हैदी ब जेखाल तोबो ते माछैँव लिज्या।” ११येसुए ओललाई धोका याव पैंज्याव मिँलाई डादाकिन ज़ सरेस्द ओनैज्यावए नो माछैँवए उजूनी ज़ पाँके।

१२येसुए याखँ हुदर्चाद डादाडाव ओहाइव ओक्वार जासिद फरी यास ज़ ज़्यान्याल चुसिद है यादोक्यो, “आव जेखँ हुर्द डायाचिउ येनए ओअर्थ जेमासैंज्याखेहो। १३जे डालाई 'गुर्बा' स्नो नो 'प्रभु' है जेदाँज्याव, नो ते थिक ज़। है जेलिज्याव मिताव डा हो ज़। १४खाली डा जेप्रभु जेगुर्बा ताद जेखँ हुर्द डायाचिज्या ल्यो ताकिन जे मनी तोबोए तोबोलाई उखँ हुदर्चाव ताके। १५डा डादोज्याव मिताव येन



जे मनी 'जेदोया' लिद नो येन जेड़ाक सतैद नैद डाय़ाचिए। १६डा जेलाई साचो है डादाचिज़्या, छुतए ओयेन दाज़्याव मिँ ओसाहुकिन घयोःव माताए। हिताव ज़ येनदा परींसिउ मिँ परींज़्यावकिन घयोःव माताए। १७है जैद जे आव डापारँ तीद ननी ज़ जेदोकिन असिक दैवर तान्या जेले।

१८“खाली आव पाँ प्राइँए जेजूनी ते माःक। हैदी ब डाछाँतिचिउ भरिलाई ते डा ज़ डासरेस्चिज़्या। आव पाँ धर्मसास्त्रलाव सर्सिउ पाँ सयोःन्याए जूनी लिज़्या। नलाव सर्सिउ आव ज़,

‘डास सिप ज़्युज़्याव ज़  
डाकिन तँदा जैसिरिज़्या।’

१९आव पाँ भरी ओमाहुद डादा ज़ है दाद डानैचिज़्या। हो ताकिन ची नो पाँ भरी ओतावत डालाई 'हो ज़ ची ओल्यो' लिद सरेस्न्या जेले। २०डा जेलाई साचो है डादाचिज़्या, जोए डापरीव मिँलाई ओल्योक हुव एज़्याव, होए डालाई मनी हुव याँज़्याव। डालाई वाज़ माःक, डालाई परींज़्यावलाई ब हुव एज़्याव।”

येसुलाई धोका याज़्याव मिँ

२१नाः है दाद येसुए उयुरँ धो थाइव ताद ओपाँ भरी काता ज़ मामोंद

उसिसरालाई, “डा जेलाई साचो है डादाचिज़्या, जेनी तोबोए डालाई धोका याँरिज़्याव,” है ओरादोक ते, २२‘काताकाव गेताव’ लिद उसिसर या याल चिऊसिकेर। २३नो बेलाक येसुए उयुँलाव मिताव तोबो उसिस ओक्याँत खदेप लिद उलिज़्याव। २४सिमोन पत्रुसए नोलाई सान दादद्याद, “नो सु है दोसाँ,” है ओदोक ते, २५नोए येसुए ओक्याँत कँ लिद, “प्रभु, नो सुकी?” है ओदोक ते, २६येसुए, “आव भरेस जोलाई चिपल छोइद डाएज़्या, हो ज़,” है दाद नो भरेसलाई केःद छोइद सिमोन इस्करियोतए ओज़ा यहूदालाई एक्यो। २७भरेस ओक्योःव प्राइँना ज़ सैतान उयुँल पसिके। है जैद येसुए नोलाई, “नँ दान्या नपैंज़्याव चाँदो ज़ दोके,” है दोक्यो। २८नो ज़्यान्याल चुसिद लिज़्यावराए, ‘काताए जूनी नै ओल्यो?’ लिन्या मासैकेर। २९ख्वा ख्वाराए, याख्वाताव पैसा यहूदाए ओक्याँत उलिज़्यावए, “पर्बए जूनी कातार लँःनाव उपरींज़्याव ताक्या, सैँ काता ज़ माल्योरालाई पैसार यानाव उपरींज़्याव ओताव,” लिन्या सम्जिकेर। ३०यहूदा नो भरेस ज़्याद बेहार ज़ पुलुस्के। नो बेलाक री ताद उलिज़्याव।

येसुए साःरो कानुन ओरायो

३१ इस्करियोत उपलुसो छींनी येसु ओल उजूंनी अइ लिद पाँके, “अब ते मिं मिन्सिउए उमिन ब रैंःरिके, परमेस्वरए उमिन ब नोए ओक्यांनी भन ज़ रैंःन्या ले। ३२ परमेस्वरए उमिन नोए ओक्याँत रैंःन्या ओतावए, ओल परमेस्वरए मनी नोस उलिज़्याव सरैंःन्या ले। नो येन परमेस्वरए हतप्त ज़ दान्या ले। ३३ अ डाबाबुज़ार, अब डा जेस कोसै लिन्या डामाले। डाबाव छींनी जे डालाई खिम्न्या जेले। खाली यहूदीराए यास्रेरालाई है डारादोव मिताव जेलाई मनी है डादाचिज़्या, डा डाबाव पोड जे हुधुन्या जेमाले। ३४ डा जेलाई तोबो साःरो कानुन डायाचिज़्या — जे जेल मया दासिच्यो। किताव डा मनी जेलाई मया डादाचिउ, हिताव ज़ जे मनी जे जेल मया दासिच्यो। ३५ निताव जे जेल मया जेदासिकिन, ‘डासिसर ज़ जेल्यो’ लिन्या प्राइँए सरैःन्या लेर।”

पत्रुसए ओयेन येसुए ड़ादा ज़ है ओदोव

(मत्ती २६:३१-३५; मर्कूस १४:२७-३१;

लूका २२:३१-३४)

३६ हाःत ज़ सिमोन पत्रुसए, “प्रभु, नँ काना नबाज़्याव?” है ओदोक ते,

येसुए, “आव बेलाक ते डा डाबाज़्यावदा नँ बाधुन्या नमाले, छींनी ते हुन्या ज़ नले,” है ओदोक ते, ३७ पत्रुसए, “कै जैद प्रभु, डा नँस माबाधुन्या? डा नजूंनी सिन्या ब तयार ज़ डालिज़्या,” है ओदोक ते, ३८ येसुए, “हुकी, डा डाजूंनी नजिउ भाःदयान्या तयार नलिज़्याव रो? डा ते नँलाई साचो है डादींज़्या, भाल्या ओमाकोद ज़ डालाई साँखेप ‘डामासरेसे’ है दान्या नले,” है दोक्यो।

परमेस्वरए ल्योदा बान्या येम येसु ज़

१४ “जे जेयुँर तासतेच्यो, परमेस्वरलाई जेयुँ उहुष्क। डालाई मनी जेयुँ उहुष्क। २ परमेस्वर डाबाबुए उभिमल लिन्या पो कुधु ज़ लिज़्या। हिताव ओमाल्यो ताकिन है मनी डामादाचिखेहो। नो डापाँ है ज़ ओतावए जेजूनी जेपोर बनैनाद डायाचिज़्या। ३ जेजूनी पोर स्यासी डाजैवत डा फरी जेलाई चाना डाहुरिज़्या। हाःकिन जे डाल्योक ड़ास सिप ज़ तान्या जेले। ४ डा डाबाज़्याव येम जे ब जेसैंज़्याखेहो।”

५ हाःत ज़ थोमाए, “प्रभु, नँ काना नबाज़्याव गे गोमासैँए, भन नो नयेम कै जैद गेसैँरिज़्याव?” है ओदोक ते, ६ येसुए, “येम ब डा ज़, साचो पाँ ब डा ज़, अजम्बरी जुनी याज़्याव ब डा ज़।

डाकिन छुतनी सु ज़ डाबाबुए ल्योड माकेस्थुर। ७ डालाई जेसरेस्नाव ताकिन डाबाबुलाई मनी सरेस्न्या जेल्यो। आकिन ते जे डाबाबुलाई सरेस्न्या जेले, जेमीए ज़ जेरें:धुके।”

८ हा:त ज़ फिलिपए, “प्रभु, गेलाई परमेस्वर नबाबु सतैंदचासिके, गेपैज़्याव ना: ज़,” है ओदोक ते, ९ येसुए, “डा आ:पै जेस ज़ लिज़्यावत ब नँ कै जैद नमासरेस्नाज़्याव, फिलिप? डालाई रँ:वए परमेस्वर डाबाबुलाई ब रँ:क्यो। कै जैद नँ डालाई रँ:द मनी ‘नबाबु परमेस्वरलाई सतैंदचासिके’ है नदाँज़्याव? १० ‘डा डाबाबुस डालिज़्या, डाबाबु डास लिज़्या’ लिन्या पाँत नयुँ माहुबे रो? डा जेलाई है डादाचिज़्याव पाँ भरी डानी सिजैंद डापाँज़्याव मा:क, डाक्याँत लिज़्याव डाबाबुए ओयेनर डानी ओदोज़्याव ची। ११ ‘डा डाबाबुस डालिज़्या, डाबाबु डास लिज़्या’ लिन्या पाँत जेयुँ उहुप्क। नो पाँत जेयुँ ओमाहुप्दी ब डादोव येननी ते जेयुँ सुहुप्चिके।

१२ ‘डा जेलाई साचो है डादाचिज़्या, डालाई उयुँ हुप्ज़्याव मिँए डादोज़्याव मिताव येनर दोरिज़्याव। डा डाबाबुए ल्योदा बाद नोस डालिरिज़्यावए होए भन नोकिन घेप्पा येनर ब दोरिज़्याव। १३ जे परमेस्वरलाई डा डामिननी जो है जेदोदी ब नो येन डा सयो:दचान्या

डाले। ननी ज़ परमेस्वर डाबाबुए ओज़गै ओज़ाए डाक्याँत रँ:न्या ले। १४ जे डामिननी डालाई कातार है जेदाँकिन नो दान्या ज़ डाले। १५ जे डालाई मया जेदाँकिन डा है डादाचिउ पाँर दान्या जेले।”

**छैंव पुरुसए जेक्याँत बास दान्या ले**

१६ “डा डाबाबु परमेस्वरलाई जेजूनी तोबो है दाद डायचिरिज़्या। होए जेलाई सघैन्या तोबो परीदचाचिरिज़्याव। नो एकमन्या जेस ज़ लिन्या ले। १७ नो सतलाव छैंव पुरुस ज़। नोलाई आव मानुवाताव मिँराए यामारँ:व यामासरेसोए मादैधुर। जे ते जेस लिद जेक्याँत बास ओदोहुरिज़्यावए जेसरेस्ज़्या। १८ डा जेलाई जेबाबु जेआमा माल्यो मितावर जैद ते डामारुख्यानैचिए। फरी जेल्योक डाहुरिज़्या। १९ छ्यावाकिन आव मानुवाताव मिँराए डालाई रँ:न्या मालेर, जे ते रँ:न्या ज़ जेले। हा:किन डा खर्क ज़ मासिन्या डातावए जे मनी सिउका सिउ तान्या जेमाले। २० हो छ्याम, ‘डा डाबाबुस डालिज़्या, जे डास जेलिज़्या, डा जेस डालिज़्या’ लिन्या सैन्या जेले। २१ जोए डापाँ थैद दोज़्याव, हो ज़ डालाई मया दाज़्याव मिँ। जोए डालाई मया दाँज़्याव, होलाई डाबाबुए मनी मया दोज़्याव।



(१५:१-५)

डा मनी होलाई मया दाद ओल्योक सरैःसिन्या डाले।”

२२ यहूदा इस्करियोतए माःक, छुत उसिस यहूदाए, “प्रभु, काराव आव मानुवाताव मिंराए ल्योक मासरैःसिन्या, गेल्योक वाज़ सरैःसिउ नपैःज्याव?” है ओदोक ते, २३ येसुए, “डालाई मया दाःज्यावए वाज़ डापाँ दोःज्याव। डाबाबुए मनी नोलाई मया ओदोःज्यावए गिन नोए ल्योक हुद नोस बास गिन्दोरिःज्या। २४ डालाई मया मादाःज्यावर ते डापाँ माभैःर। हैदी ब नो जेथैःज्याव डापाँ डानिकाव माःक, डालाई परीःज्याव डाबाबु परमेस्वरए ल्योनी हुव ची।

२५ “आव पाँ भरी जेस डालिःज्याक ज़ है दाद डानैःचिए। २६ छीनी परमेस्वर

डाबाबुए डा डामिननी जेलाई सघैःन्या छैव पुरुस परीःदयाचिरिःज्याव। नो जेस लिद प्राई पैचिरिःज्याव। आव डापाँ मनी याका दाव परीःचिरिःज्याव। २७ युँ होलाँ तान्या डाअसिक जेलाई याद डाख्यानैचिरिःज्या। नो डाअसिक आव मानुवातावराए यान्या मिताव ते माःक। जेयुँर सतेद ताछेःच्यो। २८ ‘डा डाबाःज्या, फरी डाहुरिःज्या’ लिन्या डापाँ थैव ज़ जेलिःज्या। जे डालाई साचो मया जेदाँःज्याव ताकिन डा डाबाबुए ल्योदा डाबारिःज्या है डालिक जेरेंःखेहो। नो डाबाबु डाकिन घ्योःव लिःज्या। २९ आव भरी ओमाताद डादा ज़ जेलाई है दाद डानैःचिए। नो ओताव जेरेंःवत जेयुँ हुःन्या ले। ३० अब ते डा जेस कोसै पाँव दैन्या डामाले। आव मानुवातावराए यासेर सैतान हुनाके। उहुदी ब डाक्याँत ओहक ते माले। ३१ खाली आव मानुवाताव मिंराए, डा डाबाबुलाई मया दाद है ओदाँव भरी डादोःज्याव घसैरक लिद सरैःदयाव ताके,” है लिद उसिसरालाई, “च्याँःसिचिके, गोबा,” है यादोक्यो।

जोम्परसैए ओअर्थ

१५ “डा जोम्परसैए साचो ओजरा ज़, डाबाबु जोम्परसैए ओगे ज़। २ डाक्याँताव यासै माभाःज्याव खार भरी डाबाबुए यालोःज्याव।

फरी यासै भाःज्याव खार भरी भन ज़ घभाःवक लिद नत ताज्याव तके दँ जोखारीर ब याचमज्याव। ३हो मिताव ज़ जे ते है डादाचिउ पाँए जेक्याँताव माचाव भरी हाइद ख्याद छैँवर जेताधुके। ४है जैद जे डास ज़ लिचिके, डा जेस ज़ लिन्या डाले। किताव जोम्परसैए ओखार ओक्याँत जोरैसिउ ओमालिकिन ओसै ब माभाःव, हिताव ज़ जे मनी डाक्याँत जेमालिकिन जेसै ज़ भाःन्या जेमाले।

५“डा जोम्परसैए ओजरा ज़, जे ओखारर ज़। जे नो खार माँःती डाक्याँत जेलिकिन डा मनी जेस ज़ तान्या डाले। ननी ज़ बनै जेसै ल्योर तान्या जेले। डा जेस डामालिकिन जेनी काता ज़ दाधुन्या जेमाले। ६डाक्याँत मालिज्यावर ते पल्द ख्यासिउ खार उथँव मिताव अनाकलावर तान्या लेर। निताव खारर दुप्द मेंःल भाःद चुयाप जैन्या वाज़ ताज्या। ७खाली जे डाक्याँत लिद डापाँर भैंःद जेयुँल जेनैकिन, जो जेपैदी ब दैन्या जेले। ८जे बनै जेसैर भाःद डासिसर तान्या मितावर जेताकिन परमेस्वर डाबाबुए उमिन ननी ज़ घ्योःन्या ले।

९“किताव डाबाबुए डालाई मया दाँज्याव, हिताव ज़ डा मनी जेलाई मया डादाचिज्या। है जैद जे डामयाल ज़ लिच्यो। १०डापाँ भरी

भैंःद जेदोकिन, जेल्योदा लिज्याव डामयाल ज़ लिन्या जेले। डा मनी परमेस्वर डाबाबुए ओपाँ भरी भैंःद दाद डाल्योदा लिज्याव ओमयाल ज़ डालिज्या। ११डाल्योनिकाव होलाँ तान्या युँ जेस ओताक, सोनो नो होलाँ तान्या प्राइँत ओयोःक लिद आव पाँ भरी है दाद डानैचिए।

१२“जेलाई ख्यानैद डायचिज्याव दान्या येन आव ज़, किताव डा जेलाई मया डादाचिउ, हिताव ज़ जे मनी तोबोए तोबोलाई मया दासिच्यो। १३नै मेंए ल्योदा मया उलिज्याव आनी ज़ रैंःज्या — जोए ओनैए उजूनी उजिउ भाःज्याव, हो ज़ प्राइँरानी घेप्पा मया।

१४जे है डादाचिउ पाँल जेलिकिन, जे डानैर ज़ जेताज्या। १५आकिन ते जेलाई डाबाँदार है डामादाचिए। ओबाँदारालाई ते यासाहुए ओदाँजीं प्राइँ सतैँद मारायो। डा ते डाबाबु परमेस्वरए ल्योनी डादैव भरी ओपोःस ज़ सतैँद डायचिउए जेलाई डानैर है डादाचिज्या। १६जे फरी डालाई जे जेछाँतिनाव माःक, बुरू डा जेलाई थ०रिन्या सैर ओभाःनारक लिद छाँतिद डाखतैचिके। है जैद जे परमेस्वर डाबाबुस डा डामिननी जेनिउ भरी यान्या ले। १७फरी ब नो दान्या येन ज़ ख्यानैद डायचिज्या — तोबोए तोबोलाई मया दासिच्यो।”

जेलाई सोऽयावर

१८“जेलाई आव मानुवाताव मिंराए यासोचिक नोकिन डादा डालाई यासोनाव लिन्या याका दोच्यो। १९जे आव मानुवानी तावर जेताव ताकिन आव मानुवाताव मिंराए गेमींर लिद मया दाचिखेरहो। खाली डा जेलाई आव मानुवानी डाछाँतिचिउए जे आव मानुवातावर माःक। है जैद मानुवाताव मिंराए जेलाई सोचिऽयार। २०डादा है डादाचिउ पाँ आःपै याका जेदोऽयाखेहो। छुतए ओयेन दाऽयाव मिँ ओसाहुकिन घ्योःव माताए। है जैद नोर डाखिरी यापसिकिन जे जेखिरी ब पसिन्या लेर। हिताव ज़ डा डापाँ याभैःव ताकिन जे जेपाँ ब भैःन्या याल्यो। २१खाली नोराए डालाई परींऽयावलाई यामासरेस्ऽयावए जे डामिनतावर जेतावए जेलाई दुख यान्या लेर। २२डा आव मानुवात परमेस्वरए ओपाँ डामारासथैहुव ताकिन नोराए याखत ब माताखेहो। खाली अब ते नोरालाई काता निउँ ज़ माले। २३डालाई सोऽयावराए डाबाबु परमेस्वरलाई ब सोऽयार। २४हिताव ज़ फरी सुए ज़ यामादोताव अचम्बलाव

येनर नोराए डाक डामादोव ताकिन ननी ब याखत माताखेहो। खाली निताव येनर रँऽयावत ब डालाई यासोनाव प्राइँना डाबाबुलाई ब सोकेर। २५नोराए निताव यायेननी धर्मसास्त्रलाव सर्सिउ पाँ सयोऽयार। नलाव सर्सिउ आव ज़,

‘नोराए अनाकल ज़ सोनाकेर।’

२६छीनी डा डाबाबु परमेस्वरए ल्योनी जेलाई सघैन्याए जूँनी सतलाव छैँव पुरूस परींद डायाचिरिऽया। नो पुरूस डाबाबुए ल्योनी हुद डा डाजूँनी ताव पाँ भरिए गोहाई तारिऽया। २७जे मनी डादाकिन ज़ डास जेल्योए जे ब डागोहाईर जेतारिऽया।”

१६ “जेयुँर ताक्याक लिद आव पाँर डादा ज़ डासथैचिऽया। २जेलाई इताव ब हुरिऽया — यहूदीराए धर्मसास्त्र फ़िमनी पलेचिरिऽयार।† फरी जेलाई सैःन्या सजा याऽयावर ‘परमेस्वरए ओयेन ज़ गेदोऽया’ है लिन्या लेर। ३निताव येन नोराए डाबाबुलाई ब यामासरेसोए, डालाई ब यामासरेसनावए दान्या लेर। ४आव पाँ भरी जेलाई डादा ज़ है डादाचिऽया। हो ताकिन ची जेलाई नितावर याहुक आव डापाँर याका

† १६:२ यूह ६:२२ चिऊन्या।

१५:२५ भज ३५:१६; ६६:४

दान्या जेले। नो पाँर आःपै जेस ज़ डाल्योए है डामादाचिताव।”

### छैव पुरूसए ओयेन

५“अब ते डालाई परींज्यावए ल्योदा डाबारिके, खाली ‘नँ काना नबाज्याव?’ है जेमादाँए। ६आव है डादाचिज्याव पाँए जेयूरँ माचाव जैद नैदचाचिउ। ७खाली डा साचो ज़ है डादाचिज्या, डा आनी बान्या जेलाई पाथ लिज्या। डा आनी डामाबाकिन जेलाई सधैःन्या छैव पुरूस हुन्या माले। डा डाबावत वाज़ नोलाई परींद डायचिरिज्या। ८नो उहुवत आव मानुवाताव मिँरालाई यापाप सतैदचाद, परमेस्वरए ओन्याय सोनो ओसजा आव ज़ लिद थःरैद याएरिज्याव। ९नो सतैद ओराएरिज्याव यापाप डालाई यार्युँ ओमाहुबोनी ज़ ताके। १०नो सतैद ओराएरिज्याव परमेस्वरए ओन्याय फरी डा जेड़ाकिन डाबाबु परमेस्वरए ओल्योक डाबावत रैःरिज्या। ११नो सतैद ओराएरिज्याव परमेस्वरए ओसजा फरी डा आव मानुवातावराए यास्रेर सैतानलाई ओपाहा भाःदचाद उमिन सभैद डायोत रैःरिज्या।

१२“अभू डा जेलाई है दान्या पाँर कुधु ज़ ओल्यो, खाली आवकिन कुधु ज़ है डादाचिकिन जेयुँल

नैधुन्या जेमाले। १३नो छैव पुरूस उहुवत वाज़ नोए ज़ साचो पाँर थःरैव परींद पैचिरिज्याव। नोए ओल उयुँ स्यानी सिजैसिउ पाँर पाँन्या माले, ओथैव वाज़ पाँन्या ले। नोए ज़ हुन्या पाँर ब सतैदचान्या ले। १४नोए डा डाल्योनिकाव पाँर ओपोःस ज़ छर्लङ्ग सतैदचाद डामिन ब सघ्योःदचाँरिज्याव। १५डाबाबु परमेस्वरस लिज्याव भरी डा डामीं ज़। है जैद ज़ है डादाचिउ, ‘नो पुरूसए जेलाई सतैद ओयाचिरिज्याव भरी डा डाल्योनी ज़ डा डाजूनी ज़ तारिज्या।’ ”

### जेसोगोर मेंःद जेयूरँ होलाँ तान्या ले

१६“आकिनी जाँवाक जे डालाई रँःन्या जेमाले। नकिन फरी जाँवाक वाज़ रँःन्या जेले,” है ओरादोक ते, १७उसिसर या याल, “आव काता ओपाँज्याव इताव — ‘छचावाकिन जे डालाई रँःन्या जेमाले, फरी छचावाक वाज़ रँःन्या जेले’ है लिज्या? सोनो, ‘डा डाबाबुए ल्योदा डाबारिज्या,’ है मनी लिज्या,” है लिकेर। १८नोराए, “आव ‘छचावाक’ है ओल्यो काता ओताव? आव पाँ जाँ गेमाबुभिधुके,” है यालिज्याव। १९हाःत ज़ येसुए ‘नो पाँर डालाई है दाव यापैज्याव ताखेहो’ लिद नोरालाई है यादोक्यो,

“नो ‘छ्यावाक रँःन्या जेमाले, छ्यावाक फरी जेरँःनारिऱ्या’ है डादाचिउ पाँत काताए जूँनी उल्लतानी पाल्ता जेताऱ्याव? २० नोए जूँनी साचो ज़ है डादाचिऱ्या, आव पाँत जे ते जेसोगोए चिर्लनी बिर्ल घर्न्या जेले, मानुवाताव मिँर ते बनै रँःन्या लेर। खाली नो जेसोगो रँतल त्तोसिरिऱ्या। २१ किताव तोबो ज़ा दँःन्या मेंमाए ज़ा दँःन्या बेलाक घर्लिद दुख दैऱ्याव, फरी भाउज़ा उजर्मिउत नो मेंमा उदुखर मेंःद उयुँर होलाँ ताद रँऱ्या, २२ हिताव ज़ जे मनी छ्यावा पै वाज़ सोगो दान्या जेले। फरी जेस डादैसिउत जेयुँर होलाँ ताद रँःन्या जेले। नो जेरँत सुए ज़ जेनी नैद लाँधुन्या मालेर। २३ नो बेला उहुवत जे डालाई सुधिउ परिःन्या माले। डा जेलाई साचो है डादाचिऱ्या, डामिननी जो जेनिदी ब डाबाबुए नो याचिरिऱ्याव। २४ आःपै ते जे डामिननी काता ज़ जेमानिताए। अबकिन ते निचिकेदा दँःन्या जेले। हो ताकिन ची जेरँत ब सयोःदयान्या ले।”

### येसुए उसिसराए यायुँ उहुबो

२५ “आःपै ते आव डापाँर जेस बिन्ज़ा बिन मितावनी ज़ डापाँके। तछा छीनी नो डाबाबुए उजूँनी डापाँव पाँर ओपोःस ज़ छर्लङ्ग तारिऱ्यार। २६ हो छ्याम जे ज़ डामिननी निःन्या जेले, डा जेजूनी डाबाबुस निदयाव मापरिए। २७ डा

डाबाबुए ल्योनी डाहुव लिद जेयुँ हुप्द डालाई मया जेदाँवए डाबाबुए मनी जेलाई मया दान्या ले। २८ डा डाबाबुए ल्योनी ज़ आव मानुवात डाहुके, फरी आव मानुवालाई रास्द डाबाबुए ल्योदा ज़ डाबारिऱ्या,” है यादोक्थो।

२६ हाःत ज़ उसिसराए, “अब ते नपाँ बिन्ज़ा बिननी माजैद चावस ज़ पलास्द नयासिके। ३० अब ते गेसैके, नँ प्राइँ ज़ नसैऱ्या, आकिन गे नँलाई सुधिउ ब मापरिके। नँ परमेस्वरनी हुव ज़ लिद गेयुँ मनी हुप्के,” है यादोक ते, ३१ येसुए, “डालाई बल्ल जेयुँ जेसुहुबो रो? ३२ आव मनी थैच्यो, तछा इताव बेला हरिऱ्या, नो बेला उहुधुव मिताव ब लिऱ्या, जे जेछ्याचेए चितराँ पुतराँ ताद सु सु जेफिमदा बाद डालाई डाबातड ज़ जेजैनारिऱ्या। हैदी ब डा डाबातड डामाले, परमेस्वर डाबाबु डास ज़ लिऱ्या। ३३ आव पाँ भरी जे डास लिद जेयुँ होलाँ ओताक लिद डादा ज़ है दाद डानैचिए। जे आव मानुवात दुखर वाज़ दँःन्या जेले। हितावत ब जेयुँर तासतेच्यो, डा आव मानुवालाई हारैद डानै,” है यादोक्थो।

### येसुए ओल उजूँनी ओपोःखारिउ

१७ येसु आव भरी पाँद नमदा भालिसद, “अ परमेस्वर डाबाबु, बेला योःहुके। डा नँ नमिन



सधयोःदद्यान्याए जूनी डा नज़ाए डामिनलाई ब सधयोःदद्याव ताके। २किताव नज़ालाई मिं भरिराए याडैताव नजैनाव, आथ पाला मनी डालाई नयाँव मिं भरिरालाई अजम्बरी जुनी यान्याए जूनी डामिन सधयोःदद्याव ताके। ३नोर अजम्बरी जुनी दैन्या इतावनी ज़ ताड्या — नँ तोबोका तोबो साचो परमेस्वरलाई सरेस्न्या सोनो डा नपरींनाव येसु ख्रीसलाई सरेस्न्यानी ज़। ४डालाई 'दोयो' लिद नपरींनाव येन भरी सयोःद आव मानुवात नमिन ब सधयोःद नैद डाईए। ५अ बाबु, अब ते डालाई नँस ज़ नैद आव नाम नम ओमाताद नँस गिन्लिङ्याकाव डाज़गै फरी डालाई याँयो," है लिद पोंखारिक्यो।

### येसुए उसिसराए जूनी ओपोंखारिउ

६“आव मानुवानी डालाई नयाँव मिंरालाई नमिन सतैद नैद डाराए। नोर नमीर ज़ याल्यो, नोर ज़ डालाई नयाँके। नोराए नपाँर भैःद ज़ लेर। ७नँ डालाई नयाँव पाँ भरी नँनी ज़ हुव लिद नोराए सैद नैर। ८नँ डालाई नयाँव पाँ भरी नोरालाई याद डारानै। नोराए नो पाँ भरी रैद डा नल्योनी हुव ज़ लिद थःरैद, नँ ज़ डालाई नपरींनाव

लिद यायुँ ब हुप्द ले। ९नो डालाई नयाँव मिंराए जूनी डा पोंखारिउ ज़ डालिङ्या, नोर नमीर ज़। उपुर्कावराए जूनी ते डामादोए। १०डास लिङ्याव भरी प्राई नमीर ज़, नँस लिङ्याव भरी ब प्राई डामीर ज़। नोराए याक्याँत ज़ डाज़गै रैःद ले। ११अब ते डा आव मानुवात कोसै डामाले, नल्योदा डाहुरिङ्या। नो नयाँवर ते आव मानुवात ज़ डाराख्यानैरिङ्या। है जैद अ छैव डाबाबु, नोरालाई नमिनत पाथस ज़ यानैयो। नँस गिन तोबो ज़ गिन्लिङ्याव मिताव नोर मनी तोबो ज़ ओतारक। १२डा नोरास डालेवा पै नोरालाई खेर बान्यानी जोगोइद नमिनत पाथस ज़ डारानैके। खाली धर्मसास्त्रलाव पाँलाई सयोःन्याए जूनी तोबो नर्गए ओज़ा वाज़ खेर बाके। १३अब ते डा नल्योदा डाहुरिके। खाली आव नयाँवराए यायुँर होलाँ ताद रेंद लिन्या ओतारक लिद डा आव मानुवालाई माख्यानैद डादा ज़ डापोंखारिनिङ्या। १४डा नोरालाई नँ नपाँ ज़ डाराएके। नोर डा मिताव आव मानुवातावर यामातावए मानुवाताव मिंराए यारासोङ्यार। १५नोरालाई 'आव मानुवानी नल्योदा यालाँके' लिद ते डामापोंखारिए,

खाली 'भुकैज्याव सैताननी पाथस यानैयो' है डादींज्याव ची। १६किताव डा आव मानुवाताव माःक, हिताव ज़ नोर मनी आव मानुवातावर माःक। १७नोरालाई साचो नपाँल सतस दान्या याखत माल्यो छैँवर याजैयो। नँ नपाँ सतलाव लिज्या। १८किताव डालाई आव मानुवात नपरींनाव, हिताव ज़ डा मनी नोरालाई मानुवात परींद डारानै। १९नोर साचो नपाँल याखत माल्यो छैँवर घतारक लिद डा नोराए जूँनी नयुँलाव मिताव येन दान्यात थाँसिद डाले।”

### येसुए उमींराए जूँनी ओपोंखारिउ

२०“आव डापोंखारिनिज्याव नोराए जूँनी वाज़ माःक, नोराए यापाँ थैद डाल्योदा यारुं हुपुज्यावराए जूँनी पाला ज़। २१अ परमेस्वर डाबाबु, किताव डा नँस डालिज्या, नँ डास नलिज्या, हिताव ज़ नोर मनी प्राईं तोबो ज़ ताद गिनस खैँवर ओतारक। हो ताकिन ची आव मानुवाताव मिंराए डालाई नँ ज़ नपरींनाव थ.रैन्या लेर। २२गिन तोबो ज़ गिन्लिज्याव मिताव नोर ब तोबो ज़ ओतारक लिद डालाई नयाँव ज़गै नोरालाई मनी याद डारानैए। २३है जैद नोर प्राईं तोबो ज़ ओतानारक, डा नोरास, नँ डास ओताक। ननी ज़ आव मानुवाताव मिंराए डालाई

नँ ज़ नपरींनाव सैन्या लेर। सोनो किताव डालाई मया नदाँव, नोरालाई मनी मया नरादोज्याव सैन्या लेर। २४अ बाबु, डालाई नयाँव मिंर जोड डालिज्या होड ज़ ओतारक है डालिज्या। हो ताकिन ची डालाई नयाँव ज़गै नोराए रँःधुन्या लेर। आव नाम नम ओमाताद ज़ डालाई मया दाद नज़गैर नयाँके। २५अ सतस न्याय दाज्याव डाबाबु, आव मानुवाताव मिंराए नँलाई यामासरेस्निदी ब डा ते डासरेस्निज्या। आव नमींराए मनी डा नल्योनी ज़ डाहुव लिन्या सैंद नैर। २६डा नोरालाई नमिन डारासथैके, फरी ब सथैन्या ज़ डाले। हो ताकिन ची डालाई नदाँज्याव मया नोरास तान्या ले, डा ब नोरास ज़ तान्या डाले।”

### येसुलाई याक्योःव

(मत्ती २६:४७-५६; मार्कस १४:४३-५०;

लूका २२:४७-५३)

१८ येसुए आव भरी पोंखारिद उसिसरास किद्रोन घैरा होफताव बगैचाल बाकेर। २नो पो येसुलाई सूपिज्याव यहूदा इस्करियोतए मनी सैंद ओनैज्याव। येसु उसिसरास एकतार नो पोक याबाज्याव। ३है जैद यहूदा इस्करियोतए फरिसीर सोनो मुख्या

पुजारीराए यारापरींव ध्यान फिमलाव पाल्यार सोनो सिपाईर लाँद नो बगैचाल बाकेर। नोरास हत्यारर, लाल्तिनर भॉर ब लाँद यानैज्याव। ४येसुए ओक्याँत हरिज्याव दुखर सैँद ओल ज़ नोराए याल्योक बाद, “जे सुलाई जेखिमज्याव?” है ओरादोक ते, ५नोराए, “नासरतलाव येसुलाई,” है दोकेर। नाःत ज़ येसुए, “हो ताकिन ते नासरतलाव येसु डा ज़,” है यादोक्यो। येसुलाई धोका याज्याव यहूदा इस्करियोत ब नोरास नक ज़ च्याँःसिद उलिज्याव। ६येसुए, “डा हो ज़,” है ओरादोव प्राइँना नोर प्राइँ ज़ याछीँदा सरिद पल्लिकेर। ७येसुए फरी ब, “जे सुलाई जेखिमज्याव?” है ओरादोक ते, “नासरतलाव येसुलाई,” है दोकेर। ८येसुए, “जेलाई आछ्या ज़ ‘डा हो ज़’ है डामादाचिउ रो? साचो डालाई वाज़ जेखिमनाज्याव ताकिन आव डानैरालाई बाव याराएचिके,” है यादोक्यो। ९नो है ओरादोव डादाडाव ओपोंखारिकाव मिताव ‘तोबो ज़ कै मै तातारक’ है ओल्यो पाँ सयोःन्याए जूँनी ज़ है ओरादोव। १०हाःत ज़ सिमोन पत्रुसए ओतरवाली हाइद प्रधान पुजारीए ओनोकोरलाई वोर्निकाव ओर्ना पल्द सतेदिक्यो। नो नोकोरए उमिन माल्खस ओल्यो। ११येसुए पत्रुसलाई, “नतरवाली

उसिपल भाःके। डाबाबु परमेस्वरए गोइँद ओयाँव दुखर डा कै जैद मासहिन्या?” है दोक्यो।

### येसुलाई हन्नासए ल्योक यालाँव

१२हाःत ज़ नक लिज्याव कप्तान, उसिपाईर सोनो यहूदीराए यासेरराए यारापरींव पाल्याराए येसुलाई क्योःद किद, १३हन्नासए ओल्योक लाँकेर। नो हन्नास नो साललाव प्रधान पुजारी कैयाफाए ओबागे ओल्यो। १४नो कैयाफाए ज़ डादा यहूदीराए यासेररालाई, “प्राइँ यासिज्याव देखा बुरू नोराए पोल तोबो सिन्या पाथ लिज्या,” है दाद सल्ला याज्याव मिँ।

### पत्रुसए ‘डा माःक’ है ओल्यो

(मत्ती २६ः६६-७०; मार्कूस १४ः६६-६८;  
लूका २२ः५५-५७)

१५हाः बेलाक पै सिमोन पत्रुस सोनो छुत तोबो उसिस येसुए उछीँ उछीँ निबाज्याव। नो तोबो उसिस प्रधान पुजारीस डादाकिन ज़ निसरेस्सिज्यावए नो उसिस प्रधान पुजारीए ओचतराक पै येसुस ज़ बाके। १६सिमोन पत्रुस ते साँबिलाक च्याँःसिद उलिज्याव। नो प्रधान पुजारीस सरेस्सिउ उसिस ओल्द बाद साँबिलाक पाल्या लिज्याव लुज़ालाई है दाद पत्रुसलाई ओलस ज़

चतराक लाँक्यो। १७पत्रुस साँबिलाक उपसिञ्ज्याक नो लुजाए, “नँ ब नो मिँए उसिस ज़ सा?” है ओदोक ते, पत्रुसए, “अहँ, डा माःक,” है दोक्यो। १८नो चतराक नलाव येन दाज्यावर सोनो पाल्यार याज्युँःवए मेंः दाद यामुइँसिञ्ज्याव। पत्रुस मनी नोराए ल्योक बाद मेंः मुइँसिनाके।

### प्रधान पुजारीए येसुलाई ओखोले-व

(मत्ती २६:५६-६६; मर्कूस १४:५५-६४;

लूका २२:६६-७१)

१९नकिन नो प्रधान पुजारीए येसुलाई ओरापैज्याव सोनो उसिसराए जूँनी ओखोले-क ते, २०येसुए, “डा डारासिऊज्याव पाँर मोंसिद माःक, प्राइँए रँःन्याक, प्राइँए डाक ज़ डारापैज्या। यहूदीर यादुप्सिञ्ज्याव धर्मसास्त्र फ़िम फ़िमक सोनो ध्यान फ़िमल ज़ डारासथैके। २१काराव डालाई नखोले-नाज्याव? डापाँ थैवरालाई ज़ यासुधिके, नोराए ज़ नँलाई है दान्या लेर,” है ओदोव प्राइँना ज़, २२नक लिज्याव तोबो पाल्याए, “नँ कै जैद नाःल्दिउ प्रधान पुजारीस याः नदोज्याव?” लिद तखेप लप्तैक्यो। २३हाःत ज़ फरी येसुए, “डा मापाँन्या डापाँव ताकिन डागल्ती सतैके, डा थिक ज़ डापाँज्याव ताकिन काराव नप्रोनाज्याव?”

है दोक्यो। २४नकिन हन्नासए येसुलाई किसिउ ज़ प्रधान पुजारी कैयाफाए ल्योदा परींक्यो।

### पत्रुस फरी ब ओमाभैःव

(मत्ती २६:७१-७५; मर्कूस १४:६६-७२;

लूका २२:५८-६२)

२५नाःपै सिमोन पत्रुस लाँःक च्याँःसिद मेंः मुइँसिउ ज़ उलिज्याव। नक लिज्यावराए, “नँ ब नोए उसिस ज़ सा?” है यादोक ते, पत्रुस माभैःद, “डा हो माःक,” है यादोक्यो। २६प्रधान पुजारीए तोबो ओनोकोर, डादा पत्रुसए ओर्ना पल्द सतेद ओएज्यावए ओक्याँदाडाव ब नक उलिज्याव। होए मनी पत्रुसलाई, “नँलाई आछ्याक येसुस बगैचाल नलिज्याव डारँःनिउ सानी,” है ओदोक ते, २७पत्रुसए फरी ब माभैःद, “डा माःक,” है ओदोव प्राइँना ज़ भाल्या कोके।

### रोमी सरकारलाव पिलातस

(मत्ती २७:१-२, ११-१४; मर्कूस १५:१-५;

लूका २३:१-५)

२८नकिन छकालन्या घग ज़ कैयाफाए उफ़िमनी येसुलाई रोमी हाकिमए ओमहलल लाँकेर। नो लाँज्याव यहूदीर ते, ‘भुथो ताद निस्तार पर्वत भत्यार ज्याव गेमादैया’

लिन्या छ्यासए महलल मापसिकेर। २६ है जैद हाकिम पिलातस ओल ज़ महलनी लाँक पुलुस्द नोराए ल्योक बाद, “जे आव मिँलाई काता ओखत पलेद जेएज्याव?” है ओरादोक ते, ३० प्राईए ज़ तपाँ जैद, “आवए ओखत ओमाल्यो ताकिनी, नल्योक काराव गेरैरिज्याव?” है यादोक ते, ३१ पिलातसए, “जे ज़ लाँद जे यहूदीराए जेकानुननी ज़ फाल्लिके,” है ओरादोक ते, यहूदीराए यासेरराए, “गे गोकुइत सैःन्या हक माले,” है दोकेर। ३२ नो पाँत ज़ येसुए डादा ‘इतावनी डासिरिज्या’ है उलिज्याव पाँ योके।

३३ नकिन पिलातस महलल पसिद येसुलाई खुल्द, “नँ साचो यहूदीराए याराजा ज़ रो?” है ओदोक ते, ३४ येसुए, “आव पाँ नँ ज़ नसैव सैँ डाजूनी सुवाराए है यादीव?” है ओदोक ते, ३५ पिलातसए, “डा काता डासैँए, डा यहूदी माःक। नँ नजातलाव मिँर सोनो मुख्या पुजारीराए ज़ डाल्योक रैद नैनिर। नँ मादान्या येन काता नदोव?” है ओदोक ते, ३६ येसुए, “डा डाराज्या आव मानुवाताव माःक। डाराज्या मानुवाताव ताकिन, आव डालाई क्योःज्याव यहूदीराए कुइनी जोगोइन्याए जूनी डाधूँलावर खप्सिना हुखेरहो। खाली डा डाराज्या आलाव माःक,” है दोक्यो। ३७ हाःत ज़

पिलातसए फरी, “हुकी नँ राजा ज़ रो?” है ओदोक ते, येसुए, “डा राजा डालिज्याव नँ ज़ है नदाँज्या सानी। होए उजूनी ज़ डा आव मानुवात जर्मिद साचो पाँए ओगोहाई याना डाहुके। है जैद सतलाव पाँल लिज्याव भरी डापाँ थैद दोज्यार,” है ओदोक ते, ३८ पिलातसए, “सतलाव पाँ काताकी?” है दाद लाँक यहूदीराए ल्योक बाद, “डा आव जेरैव मिँए ओखत कान्त ज़ डामादैए। ३९ जेकानुनल निस्तार पर्व छ्याम तोबो कैदीलाई रास्न्या चलन लिज्या। है जैद सैँ आथ पाला आव यहूदीराए याराजालाई रास्द डायच्यो रो?” है ओरादोक ते, ४० नोराए, “आवलाई माःक, बारब्बालाई रास्दचासिके,” लिद किकेर। बारब्बा तोबो चोर दाँका ओल्यो।

### येसुलाई सैःन्या याथरैव

(मत्ती २७:१५-३१; मर्कूस १५:६-२०;

लूका २३:१३-२५)

१९ नाःत ज़ पिलातसए येसुलाई रीःन्याए जूनी सिपाईरालाई यासूँपिक्यो। २ सिपाईराए जुए मुकुत रूंद ओडैत जास्द घ्यामन्यासो क्वा जास्द, ३ ओडाक बाद बरेद, “यहूदीराए याराजा, जय जय ओताक,” है ल्यो जैसिउ येन ओडाःत

लफरैदिकेर। ४पिलातस फरी तखेप लाँ:दा पुलुस्द नो माहोल्यारालाई, “दे आवलाई जेलाई ज़ रैद डाय़ाचिज़्या। डा डाल्योनी ते आवए ओक्याँत काता खत ज़ डामादैए, जे ज़ सैचिके,” है ओरादोव प्राइँना, ५येसु ओल ज़ नो जुए मुकुत जासिसिउ, घ्यामो क्वार क्वाइसिसिउ याड़ाक पुलुस्के। हा:त ज़ पिलातसए, “चिऊचिके, आव ज़ जेरैव मिँ,” है यादोक्यो। ६हा:त ज़ नक लिज़्याव मुख्या पुजारीर स़ोनो पाल्यार येसुलाई यारँ:व प्राइँना ज़ बनै चोइस क्रिद, “क्रुसत तङ्गैद सै:न्या!” है यादोक ते, पिलातसए, “हो ची ताकिन्दा जे ज़ लाँद क्रुसत तङ्गैचिके। डा ते आवए ओखत काता ज़ डामादैए,” है ओरादोक ते, ७यहूदीराए, “आव मिँ ओलनी ज़ परमेस्वरए ओज़ा ओजैसिउनी गे यहूदीराए गेकानुननी सिन्या सजा दैव ज़ परिए,” है दोकेर। ८पिलातस इताव पाँ थैद भन ज़ छे:द, ९येसुलाई महलल लाँद फरी ब, “नँ काताडाव नताव?” है ओदोक ते, येसुए भन ज़ घाइ ज़ मादोक्यो। १०पिलातसए फरी, “डालाई काराव घाइ नमादाँज़्याव? नँलाई तङ्गैन्या तादी ब रास्न्या तादी ब डा डाकुइत उलिज़्याव नमासैए रो?” है ओदोक ते, ११येसुए, “परमेस्वरए नँलाई ओमाईव ताकिन डा ड़ाक्याँत

नहक काता ज़ मालिखेहो। है जैद डालाई क्यो:द नँलाई याज़्यावर नँकिन घ्यो:व पापल ज़ परिकेर,” है दोक्यो।

१२पिलातसए निताव ओपाँ थैद येसुलाई रास्न्या बनै धामा दोक्यो। हितावत ब यहूदीर भन ज़ क्रिद, “आव मिँलाई नरास्किन नँ माहाराजाए ओनैँ ज़ मा:क। यानी राजा जैसिज़्याव भरी माहाराजाकिन तँदाडावर ज़ ताज़्यार सानी,” १३है यालिज़्याव थैद पिलातसए येसुलाई लाँ:क रैद हिबू खामनी गब्बथा यादोज़्याव लुँ छापिसिउ चतराक लाँद ओल फाल्न्या पोल चुसिके। १४नो छ्याम निस्तार पर्बए ओड़ालाव तयारीलाव दिन लाकाव बाह बजेवाक ओल्यो। पिलातसए यहूदीरालाई, “चिऊचिके, आव ज़ जेराजा,” है ओरादोक ते, १५नोराए भन, “आवलाई नैन्या मा:क, क्रुसत तङ्गैद सै:न्या ची,” है लिद क्रिकेर। पिलातसए फरी, “काराव जे जेराजालाई क्रुसत तङ्गैद सै:न्या है जेदाँज़्याव?” है ओरादोक ते, मुख्या पुजारीराए, “गेराजा रोमी माहाराजाकिन सु ज़ माले,” है यालिज़्याव १६थैद पिलातसए येसुलाई क्रुसत तङ्गैद सै:न्याए जूँनी यहूदीरालाई ज़ याभी:क्यो।

### येसुलाई क्रुसत यातङ्गैव

(मत्ती २७:३२-४४; मार्कुस १५:२१-३२;

लूका २३:३२-४३)

सिपाईराए येसुलाई यापासल रैद, १७ नोराए येसुलाई उक्रुस ओललाई ज़ सुधुर्द गलगथा यादोज्याव पोक लाँकेर। हिब्रू खामनी गलगथाए ओअर्थ 'खप्पज्या पो' ज़। १८ नक नोराए येसुलाई क्रुसत तङ्गैकेर। हो छचाम ओलस छुत नेब्लोनिलाई मनी ओलस ज़ यारातङ्गैकेर। येसुलाई खार्ल जैद तोबोलाई ओवोर्दा, तोबोलाई ओदाबज्यादा जैद सु सु याक्रुसत यारातङ्गैकेर। १६ पिलातसए फरी फल्यात तोबो सर्द,

“आव नासरतलाव येसु,

यहूदीराए याराजा ज़”

लिद येसुए उक्रुसत चदिक्यो। २० नो सर्सिउ हिब्रू, ल्यातिन स्नोनी ग्रीक खामनी ब उलिज्याव। येसु क्रुसत तङ्गैसिउ पो सहर छचोक ओतावए यहूदीराए कुधुए ज़ रँ:द, २१ यहूदीराए मुख्या पुजारीर पिलातसए ल्योक बाद, “नताव नसरो ‘आव यहूदीराए याराजा ज़’ है लिद सन्या मा:क, बुरू ओल ज़, ‘डा यहूदीराए याराजा ज़ है ओल्यो,’ सन्या ची,” है यादोक ते,

२२ पिलातसए, “ताधुके, जो मिताव तादी ब डासर्धुके,” है यादोक्यो।

२३ नकिन येसुलाई तङ्गैद सै:ज्याव सिपाईराए येसुए ओक्वार चार भा जैद सु सु याजुँ लाँकेर। ओतर्ताव ओक्वाइसिज्याव ओक्वा ते तपाता ज़ काङ्क ज़ मारूप्सिउ ओल्योए, २४ “आवलाई चीन्या मा:क, जोए ओल्योदा ओबादी ब गोला भा:व ताके,” है लिकेर। नो पाँत ज़ धर्मसास्त्रलाव पाँ ब यो:के। नो पाँ आव ज़,

“नोराए डाक्वार भा:द लाँन्या लेर।

ओतर्ताव डाक्वात

गोला भा:न्या लेर।”

है जैद सिपाईराए हैज जैकेर। २५ हो बेलाक क्रुसकिन जाँ होकसैक येसुए ओआमा, ओआमाए ओबैनी, क्लोपासए ओज्या मरियम स्नोनी मरियम मगदलिनीर च्याँ:सिद यालिज्याव। २६ येसुए ओआमा स्नोनी उयुँलाव उसिसनी नक च्याँ:सिद निलिज्याव रँ:द ओआमालाई, “आमा, नज़ा आव ज़,” है दोक्यो। २७ नकिन फरी उसिसलाई, “चिऊके, आव नआमा ज़,” है दोक्यो। है जैद हो छचामकिन ज़ नो उसिसए येसुए ओआमालाई उभिमक लाँद ओलस ज़ नैक्यो।

येसु उसिउ

(मत्ती २७:४५-५६; मार्कुस १५:३३-४१;

लूका २३:४४-४६)

२८हा:त ज़ येसुए, 'अब ते डाय़ेन भरी यो:के' लिन्या सैद धर्मसास्त्रलाव पाँ सयो:न्याए जूनी, "री डाछोस्ज़्या," है यादोक्यो। २९हा: बेलाक नक तोबो जाल सिरो दाखमदच भा:द यानैज़्याव। नक लिज़्यावराए भाताए उतुपात थाकना पो:द नो सिरो रील छिम्द ओया:त पिउ परींकेर। ३०येसुए नो पिद, "अब ते डाय़ेन भरी दुम्के," है लिद ओडै घोम जैद उस० सफ्या:क्यो।

३१हो छचाम तयारीलाव दिन ओल्यो, सोनो घेप्पा पर्बए ओडालाव छचाम ब उलिज़्याव। यहूदीराए याकानुननी हो छचाम नो यारासै:वरालाई क्रुसत नैन्या ओमाताज़्याव। है जैद नोराए नो क्रुसत तङ्गैसिउरालाई यास० सफ्या:दचान्याए जूनी 'याखँरँ के:दचाद क्रुसतिन भरैव ताके' है लिद पिलातसलाई बिन्ती दाद, ३२येसुए ओवोर्दाडाव मिँलाई उखँरँ के:दिकेर। नकिन ओदाबज्यादाडावलाई मनी उखँरँ के:दिकेर। ३३नकिन येसुए उखँरँ के:ना याबाक उसिधुव रँ:द

उखँरँ के:द माएकेर। ३४हा:त ज़ नक लिज़्याव तोबो सिपाईए ओज़लए येसुए ओकोखाल घोइदिक्यो। ओघोइव प्राइँना ओकोखानी भी सोनो री हुके। ३५आव पाँ भरी तोबो मिँए ओल ज़ उरँ:व। नोए ओपाँ साचो थ०रिउ ज़ लिज़्या। है जैद आव पाँत जेयुँ उहुप्क। ३६आव पाँ भरी धर्मसास्त्रलाव पाँ सयो:न्याए जूनी ज़ ताके। नलाव सर्सिउ आव ज़,

"नोलाई तके उरूस ब  
के:दचान्या मालेर।"

३७फरी तोथोल इताव मनी सर्सिउ लिज़्या,

"नो ज़लए याघोइवलाई  
प्राईँए ज़ रँ:न्या लेर।"

येसुए ओमोरो खादरल याभा:व

(मत्ती २७:५७-६१; मार्कुस १५:४२-४७;

लूका २३:५०-५६)

३८आव भरी ओतावत अरिमाथिया-लाव योसेफ पिलातसए ल्योक बाद येसुए ओमोरो निक्क्यो। नो मिँ मनी येसुए ओपाँत बाज़्याव मिँ ज़ ओल्यो। खाली नोए यहूदीराए यासेरराए छचाचेए येसुए ओपाँ जाँ मोंसिद ओदोज़्याव। नोए पिलातसए ल्योनी



हक रैद येसुए ओमोरो लाँक्यो।  
 ३६नो डादा रील मीसिद येसुए ल्योक  
 हुज्याव निकोदेमस मनी योसेफस  
 उलिज्याव। नोए बनै चाव सी डरो  
 जरार हेःसिउ बरेःद तुगुर ज़ घुर्द रैक्यो।  
 ४०नोनी यहूदीराए याचलन मितावनी  
 येसुए ओमोरोलाई नो उसी डरो जरार  
 भाःद क्वाए लुम्बैकिनी। ४१येसुलाई  
 क्रुसत तङ्गैसिउ पोकिन जाँ होकसैक  
 तोबो बगैचा उलिज्याव। नो बगैचाल  
 सुलाई ज़ यामाभाःताव साःरो  
 खादर तोबो उलिज्याव। ४२है जैद  
 यहूदीराए तयारीलाव दिन ओतावए,  
 नो नजिककाव लिज्याव खादरल ज़  
 येसुए ओमोरोलाई भाःकिनी।

### येसु सिउनी सैसिद ओबाव

(मत्ती २८:१-८; मर्कूस १६:१-८;  
 लूका २४:१-१२)

**२०** सातालाव उसं कताव  
 छचाम छकाल्न्या  
 ओमासँद ज़ मरियम मग्दलिनी बनै  
 घग ज़ येसुए ओखादरक ओबाक  
 नो खादर याःताव कसिउ घ्योःव  
 लुँ हाइसिउ रँःक्यो। २निताव रँःद  
 ननी धोंःनाद सिमोन पत्रुस स्रोनो  
 येसुए उयुँलाव उसिसनी निल्योक  
 बाद, “गेप्रभुलाई ते काताकावराए  
 खादरनी हाइद यालाँव ओल्यो। काना  
 यालाँव गेमासैए,” है उनिदोव प्राइँना,

३पत्रुस स्रोनो येसुए छुत उसिसनी  
 हतप्त ज़ खादर पोदा धोंःनाकिनी।  
 ४निधोंःनाज्याक पत्रुसलाई बलेंद  
 ओनेँ डादा खादरक केस्के। ५नो  
 खादरल मापसिद घोम लिद उचिऊक  
 येसुलाई लुम्बैसिउ क्वार वाज़ रँःक्यो।  
 ६नकिन छचावाक सिमोन पत्रुस मनी  
 खादरक ओकेस्हुव प्राइँना ज़ खादरल  
 पसिद उचिऊक होए मनी येसुए  
 ओमोरो लुम्बैसिउ क्वार वाज़ रँःक्यो।  
 ७नो ओडैताव पोःसिउ क्वालाई फरी  
 नो ओमोरो लुम्बैसिउ क्वाकिन जाँ  
 अछतड पतैद नैसिउ रँःक्यो। ८हाःत  
 ज़ नो डादा हुव येसुए छुत उसिस  
 मनी खादरल पसिद प्राइँ चिऊद येसु  
 ओसोव ज़ ओल्यो लिद उयुँ हुप्के।  
 ९नोनी नोकिन डादा नो धर्मसास्त्रलाव  
 सर्सिउ पाँ ‘येसु उसिदी ब सोन्या ले’  
 लिन्या निमाथःरैताव। १०नकिन नो  
 उसिसनी निक्किमदा ओल्द बाकिनी।

### येसु मरियम मग्दलिनीए ओडाक ओसरैःसिउ

(मत्ती २८:९-१०; मर्कूस १६:९-११)

११मरियम मग्दलिनी ते खादर  
 छचोक च्याँःसिद घरो ज़ उलि-  
 ज्याव। नाःत ज़ घोम लिद खादरल  
 तखेप ओभाल्सिक, १२परमेस्वरए  
 ओचाकज्यानी नेब्लो पाल पालो  
 क्वा क्वाइसिउनी निरँःक्यो। नोनी



(२०:५)

येसुलाई नैसिउ पोक तोबो उगुमदा, तोबो उखँदा चुसिद निलिज़्याव। १३नोनी मरियमलाई, “अ माँ, नँ काराव नघज़्याव?” है निदोक ते, नोए, “डाप्रभुलाई काताकावराए आव खादरनी हाइद यालाँव ओल्यो। काना यालाँव ओताव डामासैए,” है निदोक्यो। १४ना: है दाद नो मेंमा उछींदा ओभाल्सिक येसु नक च्याँ:सिद उलिज़्याव रँ:क्यो। खाली येसु ज़ लिन्या मासरेस्थुक्यो। १५हा:त ज़ येसुए, “अ माँ, नँ काराव नघज़्याव, सुलाई नखिम्ज़्याव?” है ओदोक ते, नो मेंमाए, आव ते बगैचालाव माली ची सा लिद, “अ दाज्यु, येसुलाई नँ आनी हाइद नलाँव ताकिन, ‘आक डानैज़्या’ है दाव ताके। डा होलाई डालाँरिज़्या,” है ओदोक ते, १६येसुए,

“अ मरियम,” है ओदोव प्राइँना नो मेंमा ओल्योदा फर्किद, “रब्बोनी!” है दोक्यो। (हिब्रू खामनी रब्बोनीए ओअर्थ ‘गुर्बा’।) १७हा:त ज़ येसुए, “डालाई ताछापनायो, डा आ:पै डाबाबुए ल्योक डामाबाताए। बुरू डानैरालाई, ‘डाबाबु परमेस्वर सोनो जेबाबु परमेस्वरए ल्योदा डाबारिज़्या’ है यादोनाके,” है दोक्यो। १८हो प्राइँना ज़ मरियम मगदलिनी उसिसराए ल्योदा धों:नाद प्रभुलाई उरँ:व सोनो है ओदोव पाँ भरी ब है यादोक्यो।

**येसु उसिसराए याड़ाक ओसरै:सिउ**

(मत्ती २८:१६-२०; मर्कूस १६:१४-१८;

लूका २४:३६-४६)

१९हो छचाम रिमक ज़ येसुए उसिसर यहूदीराए छचाचेए याम

गल्द भिमल यालिज़्याव। नो छचाम आइतबार ओल्यो। नाःत ज़ येसु उमँःजानी उसिसराए खार्ल च्याँःसिहुद, “जेयुँर होलाँ ओताक,” है लिद, २० येसुए उकुइर ओकोखार सतैंद याएक्यो। याप्रभुलाई रँःद नोर यायुँर होलाँ ताद बनै रँकेर। २१ येसुए फरी ब, “जेयुँर होलाँ ओताक। किताव डाबाबुए डालाई उपरीनाव, हिताव ज़ जेलाई मनी डापरीचिज़्या,” है दाद, २२ नोराए ल्योदा उस० हवास जैद, “आख ते छैव पुरूस दोचिके,” है यादोक्यो। २३ नकिन फरी, “जे मिँरालाई यापाप क्याल्द जेराएकिन, नोराए यापाप क्याल्सिद परमेस्वरस खैवर तान्या लेर। फरी यापाप क्याल्द जेमाराएकिन नोराए यापाप हिताव ज़ रहिरिज़्या।”

### थोमाए येसुलाई ओसरेसो

२४ येसु उसिसराए ल्योक उहुव छचाम दिदुमस यादोज़्याव थोमा नल ओमाल्यो। २५ छीनी उपुर्काव उसिसराए थोमालाई, “गे गेप्रभुलाई गेरँःके,” है यादोक ते, नोए, “डा भँ किलाए उकुइ सघ्वाँःसिउ कुँ रँःद होल डाआडुला डामालुइवा पै स्लोनो ओकोखाल डाकुइ डामालुइवा पै डायुँ ज़ माहुबे,” है यादोक्यो।

२६ हुकिनकाव साताक फरी उसिस भरी याम गल्सिद भिमल यालिज़्याव। हो छचाम ते थोमा ब यास ज़ उलिज़्याव। हाःत ज़ निताव याम गल्सिउ उलिज़्यावत ब येसु उमँःजानी याखार्ल च्याँःसिहुद, “जेयुँ होलाँ ओताक,” है यादोक्यो। २७ नकिन थोमालाई, “आव डाकुइ सघ्वाँःसिउल नआडुला लुइके, डाकोखाल ब नकुइ लुइद माहुबो नयुँलाई सुहुप्के,” है ओदोव पाईंना, २८ थोमाए, “अ डाप्रभु, डापरमेस्वर, नँ ज़ ची नल्यो,” है लिके। २९ हाःत ज़ येसुए, “थोमा, नँ ते डालाई रँःद नयुँ हुप्के। खाली डालाई मारँःद उयुँ हुप्ज़्याव ते भन धन्याकाव लिज़्या,” है दोक्यो।

### आलाव सर्सिउ जेयुँ सुहुप्दचान्याए जूनी ज़

३० येसुए उसिसराए याड़ाक आव पोस्तोकोल मासर्सिउ छुत सरेसर मनी कुधु ज़ सतैंद याएक्यो। ३१ खाली आलाव सर्सिउ भरी जे येसुलाई, परमेस्वरए ओज़ा गेलाई बाँचैज़्याव ख्रीस ज़ लिद जेयुँ सुहुप्दचान्याए जूनी सर्द डायचिके। हो ताकिन ची जे नोए ल्योदा जेयुँ जेसुहुप्किन होए उमिननी अजम्बरी जुनी दैन्या जेले।

ल्यो माल्यो डाँःर

**२१** फरी छीनी मनी तछा  
 येसु उसिसराए याड़ाक  
 गालील खन्दलाव तिबेरियास दहक  
 सरैःसिके। नक इताव ताके — **२**नक  
 लिज़्यावर सिमोन पत्रुस, दिदुमस  
 यादोज़्याव थोमा, गालीललाव काना  
 नाखारलाव नथानेल, जब्दियाए  
 ओज़ानी सोनो छुत नेब्लो उसिसनी  
 याल्यो। **३**नो बेलाक सिमोन पत्रुसए  
 ओनैरालाई, “डा ते डाँःर क्योःना ची  
 तखेप डाबारिज़्या,” है ओरादोक ते,  
 ओनैराए, “गे मनी नँस ज़ गेबारिज़्या,”  
 है दाद नोर प्राइँ दोङ्गाल पसिद रील  
 तुबुरी लिद ब डाँःर तोबो ब माताकेर।  
**४**नम ज़राँः ज़राँः उसँनाक येसु दह  
 छचोक च्याँःसिद उलिज़्याव। खाली  
 उसिसराए येसु ज़ लिद मासरेस्थुकेर।  
**५**हाःत ज़ येसुए, “अ बाबुज़ार, डाँःर  
 खावा ताज्या की?” है ओरादोक ते,  
 “अहँ, तोबो ब मातार,” है दोकेर।  
**६**नकिन येसुए, “जेदोङ्गाए ओवोर्दा  
 जेजाल ख्याचिके, नल डाँःर दैन्या  
 जेले,” है ओरादोक ते, याजालर  
 याख्याक ल्यो माल्यो डाँःर हुद  
 याजाल ब मास्रेलधुकेर। **७**हाःत ज़  
 येसुए उयुँलाव उसिसए पत्रुसलाई,  
 “नो ते गेप्रभु ज़ ची ओल्यो,” है  
 ओदोव प्राइँना पत्रुस लाला लुलु

हाइसिउ ओक्वार क्वाइसिद दहल  
 ज़ोःद येसुए ल्योदा बाके। **८**उपुर्काव  
 उसिसर ते दोङ्गाल ज़ लिद डाँःर ल्यो  
 जाललाई सेले सेले पाखात पुलुस्केर।  
 नो डाँःर याराक्योःव पो कोसै तादाड  
 ते ओमाल्यो, दह छचोकिन तसय  
 मितरवा वाज़ ओल्यो।

**९**नोर दह छचोक याहुवत मेंः  
 दासिउ मुथाल येसुए भरेसर डाँःर  
 हिपद ओनैज़्याव रँःकेर। **१०**नाःत ज़  
 येसुए, “जेराक्योःव डाँःर नेबरेंवा  
 रैचिके,” है ओरादोक ते, **११**सिमोन  
 पत्रुस दोङ्गाल पसिद नो डाँःर लिज़्याव  
 जाललाई पाखात सेल्द रैक्यो। नल  
 घेप्पा घेप्पा डाँःर तसय त्रिपन्न गोता  
 यागैव ओल्यो। हितावत मनी नो जाल  
 जात्त ज़ ओमाचिसो ओल्यो। **१२**नकिन  
 येसुए फरी नोरालाई क्रिद, “जेयाः  
 बितालिहुचिके,” है यादोक्यो। नोराए  
 फरी येसुलाई यासरेस्दी ब सुए ज़ ‘नँ  
 ते गेप्रभु ची सा’ है मादोधुकेर। **१३**येसु  
 हुद भरेसर डाँःर उकुइत रैद नोरालाई  
 भाःद याएक्यो। **१४**येसु सिद सैसिद  
 ओसोव छीनी उसिसराए डाक आवस  
 सोंखेप सरैःसिके।

येसुए पत्रुसलाई सोंखेप उमीं ज़  
 ओजैव

**१५**नोर यायाःर याबितालिउत येसुए  
 सिमोन पत्रुसलाई, “अ यूहन्नाए ओज़ा

सिमोन, नँ डालाई आवराकिन कुधु ज़ मया नदाँज़्याव रो?” है ओदोक ते, पत्रुसए, “हैज़ प्रभु, नँलाई मया डादींज़्याव नँ ज़ नसैंज़्या,” है ओदोक ते, येसुए, “हो ची ताकिन्दा डापाथार छोदचॉके।” १६नकिन येसुए फरी ब, “अ यूहन्नाए ओज़ा सिमोन, डालाई साचो ज़ मया नदाँज़्याव रो?” है ओदोक ते, पत्रुसए, “हैज़ प्रभु, नँलाई मया डादींज़्याव नँ ज़ नसैंज़्या,” है ओदोक ते, येसुए, “हो ची ताकिन्दा डाबेधारालाई याचिऊयो,” है दोक्यो। १७फरी ब येसुए, “अ यूहन्नाए ओज़ा सिमोन, है जैद डालाई मया नदाँज़्याव ज़ रो?” है ओदोक ते, पत्रुसलाई नो पाँ स्रोंखेप है ओदोवए पत्रुसए उयुँ माचाव दाद, “प्रभु प्राइँ युँलाव पाँ नसैंज़्या। नँलाई मया डादींज़्याव मनी नँ ज़ नसैंज़्या सानी,” है ओदोक ते, येसुए, “हो ची ताकिन्दा डाबेधार पाथस छोदचॉके। १८डा नँलाई साचो है डादींज़्या, नसार् उलिंज़्याव बेलाक नवाँ:फोर पो:सिद जोदा बान्या नयुँ लिंज़्या होदा ज़ नबाज़्याव। खाली नसार् खेम्द नसेरोत नकरर रा:दचाद नवाँ:फोर छुतए पो:दचाद बान्या युँ नमादोऽ्यावदा करस ज़ लाँन्या लेर,” है दोक्यो। १९येसुए आव पाँर, ‘पत्रुस इतावनी सिद परमेस्वरए उमिन सघ्यो:दचान्या ले’ लिद ड़ादा ज़

सतैदिक्यो। है जैद येसुए पत्रुसलाई आव भरी है दाद, “डाछींत हुन्के,” है दोक्यो।

२०ना:त ज़ पत्रुस उछींदा ओभाल्सिक येसुए उयुँलाव उसिस मनी उछीं उछीं उहुंज़्याव रँ:क्यो। नो उसिस ज़ ड़ादाडाव नो भत्यारल येसुए ओछातीत कँ लिद, “प्रभु, नँलाई धोका याऽ्याव सु?” है दाऽ्याव मिँ। २१पत्रुसए नोलाई रँ:द येसुलाई, “प्रभु, आवलाई छींनी कै तान्या?” है ओदोक ते, २२येसुए, “डा फरी ड़ामाहुवा पै नो मिँलाई मासिन्या डाजैदी ब नँ है लिन्या काता ओमेला ज़ माले, नँ डाछींत घुहुनी,” है दोक्यो। २३नो येसुए ओपाँनी ज़ नो उसिस सिन्या माले लिन्या यायुँ हुबोराए खार्ल फींजिके। खाली ओल येसुए ते ‘आव सिन्या माले’ है ओदोव ते मा:क। ‘डा फरी ड़ामाहुवा पै आव मिँ ओमासिदी ब नँ है लिन्या ओमेला माले,’ है वाज़ ओदोव ची।

२४आव पाँर ड़ामीए रँ:द सऽर्याव डा नो उसिस ज़। आव डासरो पाँ भरी साचो थ०रिउ ज़ लिंज़्या।

२५आव डासरोकिन येसुए छुत ब कुधु येनर ज़ दाद नैव। खाली तोबो तोबोनी सन्या ताकिन सर्सिउ पोस्तोकोर आव मानुवात ब मासुइँ:खेहो।